


EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5


11-71
GR Ko, Hung
335 Shen hsien chuan
K6
1794


East Asia


PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY









GR

335

K6

1794

龍威秘書一集

漢魏叢書採珍十九種

第四冊

神仙傳卷一至卷五

晉葛洪

神仙傳序

子著內篇論神仙之事凡二十卷弟子滕升問曰先生云仙化可得不死可學古之得仙者豈有其人乎子答曰秦大夫阮倉所記有數百人劉向所撰又七十餘人然神仙幽隱與世異流世之所聞者猶千不得一者也故竊子入火而陵煙馬皇見迎於護龍方回變化於雲母赤將茹葩以隨風涓子餌朮以著經嘯父別火於無窮務光游淵以哺薤仇生却老以食松朮疏煮石以練形琴高乘鯉於碭中桂父改色以

龜腦女九七十以增容陵陽吞五脂以登高商邱咀
菖蒲以無終雨師鍊五色以屬天子先轡兩虬於玄
塗周晉跨素鶴於緱氏軒轅控飛龍於鼎湖葛由策
木羊於綏山陸通匝遐紀於橐盧蕭史乘鳳而輕舉
東方飄幘於京師攢子鬻桃以淪神主桂飛行以餌
砂阮邱長存於睢嶺英氏乘魚以登遐脩羊陷石於
西岳馬丹迴風以上徂鹿翁陟險而流泉園客蟬蛻
於五華子今復抄集古之仙者見於仙經服食方及
百家之書先師所說耆儒所論以爲十卷以傳知真

識遠之士其繫俗之徒思不經微者亦不彊以示之
則知劉向所述殊甚簡略美事不舉此傳雖深妙奇
異不可盡載猶存大體竊謂有愈於劉向多所遺棄
也晉抱朴子葛洪稚川題

元
一
一
月

神仙傳目錄

卷一

廣成子

老子

彭祖

魏伯陽

卷二

白石先生

黃初平

王遠

伯山甫

馬鳴生

李八百

李阿

卷三

河上公

劉根

李仲甫

李意期

王興

趙瞿

王遙

李常在

卷四

劉安

陰長生

張道陵

卷五

泰山老父

巫炎

劉憑

樂巴

左慈

壺公

薊子訓

卷六

李少君

孔元方

王烈

焦先

孫登

呂文敬

沈建

董奉

卷七

太玄女

西河少女

程偉妻

麻姑

樊夫人

嚴清

帛和

東陵聖母

葛玄

卷八

鳳綱

衛叔卿

墨子

孫博

天門子

王子

沈義

陳安世

劉政

卷九

茅君

蘇仙公

孔安國

尹軌

介象

成仙公

郭璞

尹思

卷十

沈文泰

涉正

皇化

北極子

李修

柳融

蒯越

陳永伯

董仲君

王仲都

離明

劉京

清平吉

黃山君

靈壽光

李根

黃敬

甘始

平仲節

宮嵩

王真

陳長

班孟

董子陽

東郭延

戴孟

魯女生

陳子皇

封衡

元
仁
仁

神仙傳卷一

漢魏叢書原本

晉 葛洪著 武林徐仁範閣

廣成子

廣成子者古之仙人也居崆峒之山石室之中黃帝
聞而造焉曰敢問至道之要廣成子曰爾治天下禽
不待候而飛草木不待黃而落何足以語至道黃帝
退而閒居三月後往見之膝行而前再拜請問治身
之道廣成子答曰至道之精杳杳冥冥無視無聽抱
神以靜形將自正必靜必清無勞爾形無搖爾精乃

可長生慎內閉外多知爲敗我守其一以處其和故
千二百歲而形未嘗衰得我道者上爲皇失吾道者
下爲土將去汝入無窮之門游無極之野與日月叅
光與天地爲常人其盡死而我獨存矣

老子

老子者名重耳字伯陽楚國苦縣曲仁里人也其母
感大流星而有娠雖受氣天然見於李家猶以李爲
姓或云老子先天地生或云天之精魄蓋神靈之屬
或云母懷之七十二年乃生生時剖母左腋而出生

而白首故謂之老子或云其母無夫老子是母家之
姓或云老子之母適至李樹下而生老子生而能言
指李樹曰以此爲我姓或云上三皇時爲玄中法師
下三皇時爲金闕帝君伏羲時爲鬱華子神農時爲
九靈老子祝融時爲廣壽子黃帝時爲廣成子顓頊
時爲赤精子帝嚳時爲祿圖子堯時爲務成子舜時
爲尹壽子夏禹時爲真行子殷湯時爲錫則子文王
時爲文邑先生一云守藏史或云在越爲范蠡在齊
爲鴟夷子在吳爲陶朱公皆見於羣書不出神仙正

經未可據也葛稚川云洪以爲老子若是天之精神
當無世不出俯尊就卑委逸就勞背清澄而入臭濁
棄天官而受人爵也夫有天地則有道術道術之士
何時暫乏是以伏羲以來至於三代顯名道術世世
有之何必常是一老子也皆由晚學之徒好奇尚異
苟欲推崇老子故有此說其實論之老子蓋得道之
尤精者非異類也按史記云老子之子名宗仕魏爲
將軍有功封於段至宗之子汪汪之子言言之玄孫
瑕仕於漢瑕子解爲膠西王太傅家於齊則老子本

神靈耳。淺見道士欲以老子爲神異。使後代學者從之。而不知此更使不信長生之可學也。何者。若謂老子是得道者。則人必勉力競慕。若謂是神靈異類。則非可學也。或云老子欲西度關。關令尹喜知其非常人也。從之問道。老子驚恠。故吐舌。聃然。遂有老聃之號。亦不然也。今按九變及元生十二化經。老子未入關時。固已名聃矣。老子數易名字。非但一聃而已。所以爾者。按九宮及三五經及元辰經云。人生各有厄會。到其時。若易名字。以隨元氣之變。則可以延年度。

厄今世有道者亦多如此老子在周乃三百餘年二百年之中必有厄會非一是以名稍多耳欲正定老子本末故當以史書實錄爲主并老仙經祕文以相叅審其他若俗說多虛妄洪按西昇中胎及復命苞及珠韜玉機金篇內經皆云老子黃白色美眉廣顙長耳大目疎齒方口厚唇額有三五達理日角月懸鼻純骨雙柱耳有三漏門足蹈二五手把十文以周文王時爲守藏史至武王時爲柱下史時俗見其久壽故號之爲老子夫人受命自有神通遠見者稟氣

是常人不同應爲道主故能爲天神所濟衆仙所從
是以所出度世之法九丹八石金醴金液次存立素
守一思神歷藏行氣鍊形消災辟惡治鬼養性絕穀
變化厭勝教戒役使鬼魅之法凡九百三十卷符書
七十卷皆老子本起中篇所記者也自有目錄其不
在此數者皆後之道士私所增益非真文也老子恬
淡無欲專以長生爲務者故在周雖久而名位不遷
者蓋欲和光同塵內實自然道成乃去蓋仙人也孔
子嘗往問禮先使子貢觀焉子貢至老子告之曰子

之師名耶相從三年而後可教焉孔子既見老子老子告曰良賈深藏若虛君子盛德若愚去子之驕氣與多欲淫志是皆無益於子也孔子讀書老子見而問之曰何書曰易也聖人亦讀之老子曰聖人讀之可也汝曷爲讀之其要何說孔子曰要在仁義老子曰蚊蚋嚼膚通夕不得眠今仁義慘然而汨人心亂莫大焉夫鵠不日浴而白鳥不日染而黑天之自高矣地之自厚矣日月自明矣星辰固自列矣草木固有區矣夫子修道而趨則以至矣又何用仁義若繫

鼓以求亡羊乎。夫子乃亂人之性也。老子問孔子曰：「亦得道乎？」孔子曰：「求二十七年而不得也。」老子曰：「使道可獻人，則人莫不獻之；其君矣。使道可進人，則人莫不進之；其親矣。使道可告人，則人莫不告之；兄弟矣。使道可傳人，則人莫不傳之；其子矣。然而不可者，無他也。中無主而道不可居也。」孔子曰：「王治詩書禮樂易春秋，誦先王之道，明周召之迹，以于七十餘君，而不見用，甚矣人之難說也。」老子曰：「夫六藝先王之陳迹也，豈其所陳哉？今子所修者，皆因陳迹也。迹者，

履之出而迹豈異哉。孔子歸三日不談。子貢恠而問之。孔子曰。吾見人之用意如飛鳥者。吾飾意以爲弓弩射之。未嘗不及。而加之也。人之用意如麋鹿者。吾飾意以爲走狗而逐之。未嘗不銜而頓之也。人之用意如淵魚者。吾飾意以爲鈎緡而投之。未嘗不鈎而制之也。至於龍乘雲氣遊太清。吾不能逐也。今見老子其猶龍乎。使吾口張而不能翕。舌出而不能縮。神錯而不知其所居也。陽子見於老子。老子告之曰。虎豹之文。猿獫之捷。所以致射也。陽子曰。敢問明王之

治老子曰明王之治功蓋天下而以不自己化被萬物而使民不恃其有德而不稱其名位乎不測而遊乎無有著也老子將去而西出關以昇崑崙關令尹喜占風氣逆知當有神人來過乃掃道四十里見老子而知是也老子在中國都未有所授知喜命應得道乃停關中老子有客徐甲少賃於老子約日雇百錢計欠甲七百二十萬錢甲見老子出關遊行速索償不可得乃倩人作辭詣關令以言老子而爲作辭者亦不知甲已隨老子二百餘年矣唯計甲所應得

直之多許以女嫁甲。甲見女美，尤喜，遂通辭於尹喜。得辭，大驚，乃見老子。老子問甲曰：「汝久應死，吾昔貸汝爲官，卑家貧無有使役，故以太玄清生符與汝，所以至今日。汝何以言吾語？」汝到安息國，固當以黃金計直還汝。汝何以不能忍，乃使甲張口向地，其太玄真符立出於地，丹書文字如新。甲成一聚枯骨矣。喜知老子神人能復使甲生，乃爲甲叩頭請命，乞爲老子出錢還之。老子復以太玄符投之。甲立更生。喜卽以錢二百萬與甲，遣之而去，并執弟子之禮具以

長生之事授喜喜又請教誠老子語之五千言喜退而書之名曰道德經焉尹喜行其道亦得仙漢竇太后信老子之言孝文帝及外戚諸竇皆不得不讀讀之皆大得其益故文景之世天下謐然而竇氏三世保其榮寵太子太傅疎廣父子深達其意知功成身退之義同日棄官而歸散金布惠保其清貴及諸隱士其遵老子之術者皆外損榮華內養生壽無有顛沛於險世其洪源長流所潤洋洋如此豈非乾坤所定萬世之師表哉故莊周之徒莫不以老子爲宗也

彭祖

彭祖者姓錢諱鏗帝顓頊之玄孫也殷末已七百六十七歲而不衰老少好恬靜不卹世務不營名譽不飾車服唯以養生治身爲事王聞之以爲大夫常稱疾閑居不與政事善於補導之術服水桂雲母粉麋角散常有少容然性沈重終不自言有道亦不作詭惑變化鬼恠之事窈然無爲少周遊時還獨行人莫知其所詣伺候竟不見也有車馬而常不乘或數百日或數十日不持資糧還家則衣食與人無異常閑

氣內息從旦至中乃危坐拭目摩搦身體舐唇咽唾服氣數十乃起行言笑其體中或疲倦不安便導引閉氣以攻所患心存其體面九竅五臟四肢至於毛髮皆令具至覺其氣雲行體中故於鼻口中達十指末尋卽體和王自往問訊不告致遺珍玩前後數萬金而皆受之以恤貧賤無所留又采女者亦少得道知養性之方年二百七十歲視之如五六十歲奉事之於掖庭爲立華屋紫閣飾以金玉乃令采女乘輜輶往問道於彭祖旣而再拜請問延年益壽之法彭

祖曰欲舉形登天上補仙官當用金丹此九召太一所以白日昇天也此道至大非君王之所能爲其次當愛養精神服藥草可以長生但不能役使鬼神乘虛飛行身不知交接之道縱服藥無益也能養陰陽之意可推之而得但不思言耳何足恠問也吾遺腹而生三歲而失母遇太戎之亂流離西域百有餘年加以少枯喪四十九妻失五十四子數遭憂患和氣折傷冷熱肌膚不澤榮衛焦枯恐不度世所聞淺薄不足宣傳大宛山有青精先生者傳言千歲色如童

子步行日過五百里能終歲不食亦能一日九食真
可問也采女曰敢問青精先生是何仙人者也彭祖
曰得道者耳非仙人也仙人者或竦身入雲無翅而
飛或駕龍乘雲上造天階或化爲鳥獸遊浮青雲或
潛行江海翱翔名山或食元氣或茹芝草或出入人
間而人不識或隱其身而莫之見面生異骨體有奇
毛率好深僻不交俗流然此等雖有不死之壽去人
情遠榮樂有若雀化爲蛤雉化爲蜃失其本真更守
異氣余之愚心未願此已入道當食甘旨服輕麗通

陰陽處官秩耳。骨節堅彊。顏色和澤。老而不衰。延年久視。長在世間。寒溫風濕不能傷。鬼神衆精莫敢犯。五兵百虫不可近。嗔喜毀譽不爲累。乃可爲貴耳。人受氣雖不知方術。但養之得宜。常至百二十歲。不及此者。傷也。小復曉道。可得二百四十歲。加之可至四百八十歲。盡其理者。可以不死。但不成仙人耳。養壽之道。但莫傷之而已。夫冬溫夏涼。不失四時之和。所以適身也。美色淑姿。幽閑娛樂。不致思慾之惑。所以通神也。車服威儀。知足無求。所以一志也。八音五色。

以悅視聽。所以導心也。凡此皆以養壽而不能斟酌之者。反以速患。古之至人。恐下才之子。不識事宜。流遞不還。故絕其源。故有上士別牀。中士異被。服藥百裹。不如獨臥。五音使人耳聾。五味使人口爽。苟能節宣其宜。適抑揚其通塞者。不以減年得其益也。凡此之類。譬猶水火用之過當。反爲害也。不知其經脈損傷。血氣不足。內理空疎。髓腦不實。體已先病。故爲外物所犯。因氣寒酒色以發之耳。若本充實。豈有病也。夫遠思彊記傷人。憂喜悲哀傷人。喜樂過差忿怒不

解傷人汲汲所願傷人陰陽不順傷人有所傷者數種而獨戒於房中豈不惑哉男女相成猶天地相生也所以神氣導養使人不失其和天地得交接之道故無終竟之限人失交接之道故有傷殘之期能避衆傷之事得陰陽之術則不死之道也天地晝分而夜合一歲三百六十交而精氣和合故能生產萬物而不窮人能則之可以長存次有服氣得其道則邪氣不得入治身之本要其餘吐納導引之術及念體中萬神有含影守形之事一千七百餘條及四時首

向責已謝過臥起早寢之法皆非真道可以教初學者以正其身人受精養體服氣煉形則萬神自守其真不然者則榮衛枯悴萬神自逝悲思所留者也人爲道不務其本而逐其末告以至言而不能信見約要之書謂之輕淺而不盡服誦觀夫太清北神中經之屬以此自疲至死無益不亦悲哉又人苦多事少能棄世獨往山居穴處者以道教之終不能行是非仁人之意也但知房中閉氣節其思慮適飲食則得道也吾先師初著九節都解指韜形隱遯尤爲開明

四極九室諸經萬三千首爲以示始涉門庭者采女
具受諸要以教王王試之有驗殷王傳彭祖之術屢
欲祕之乃下令國中有傳祖之道者誅之又欲害祖
以絕之祖知之乃去不知所之其後七十餘年聞人
於流沙之國西見之王不常行彭祖之術得壽三百
歲氣力丁壯如五十時得鄭女妖姪王失道而殂俗
間言傳彭祖之道殺人者由於王禁之故也後有黃
山君者修彭祖之術數百歲猶有少容彭祖旣去乃
追論其言以爲彭祖經。

魏伯陽

魏伯陽者吳人也。本高門之子。而性好道術。後與弟子三人入山作神丹。丹成。知弟子心懷未盡。乃試之。曰。丹雖成。然先宜與犬試之。若犬飛。然後人可服耳。若犬死。卽不可服。乃與犬食之。犬卽死。伯陽謂弟子曰。作丹唯恐不成。旣今成。而犬食之死。恐是未合神明之意。服之恐復如犬爲之。奈何。弟子曰。先生當服之否。伯陽曰。吾肯違世路。委家入山。不得道。亦耻復還死之與生。吾當服之。乃服丹入口。卽死。弟子顧視。

相謂曰作丹以求長生服之卽死當奈此何獨一弟子曰吾師非常人也服此而死得無意也因乃取丹服之亦死餘二弟子相謂曰所以得丹者欲求長生耳今服之旣死焉用此爲不服此藥自可更得數十歲在世間也遂不服乃共出山欲爲伯陽及死弟子求棺木二子去後伯陽卽起將所服丹納死弟子及白犬口中皆起弟子姓虞遂皆仙去道逢入山伐木人乃作手書與鄉里人寄謝二弟子乃始懊恨伯陽作叅同契五行相類凡三卷其說是周易其實假借

交象以論作丹之意而世之儒者不知神丹之妙多
作陰陽注之殊失其旨矣

神仙傳卷一終

山陽志

創製之教其以

其人之意而

神仙傳卷二

白石先生

白石先生者中黃丈人弟子也至彭祖時已二千歲
餘矣不肯修昇天之道但取不死而已不失人間之
樂其所據行者正以交接之道爲主而金液之藥爲
上也初以居貧不能得藥乃養羊牧豬十數年間約
衣節用置貨萬金乃大買藥服之常煮白石爲糧因
就白石山居時人故號曰白石先生亦食脯飲酒亦
食穀食日行三四百里視之色如四十許人性好朝

拜事神好讀幽經及太素傳彭祖問之曰何不服昇天之藥答曰天上復能樂比人間乎但莫使老死耳。天上多至尊相奉事更苦於人間故時人呼白石先生爲隱遁仙人以其不汲汲於昇天爲仙官亦猶不求聞達者也

黃初平

黃初平者丹溪人也年十五家使牧羊有道士見其良謹便將至金華山石室中四十餘年不復念家其兄初起行山尋索初平歷年不得後見市中有一道

士初起召問之曰吾有弟名初平因令牧羊失之四十餘年莫知死生所在願道君爲占之道士曰金華山中有一牧羊兒姓黃字初平是卿弟非疑初起聞之卽隨道士去求弟遂得相見悲喜語畢問初平羊何在曰近在山東耳初起往視之不見但見白石而還謂初平曰山東無羊也初平曰羊在耳兄但自不見之初平與初起俱往看之初平乃叱曰羊起於是白石皆變爲羊數萬頭初起曰弟獨得仙道如此吾可學乎初平曰唯好道便可得之耳初起便棄妻子

留住就初平學共服松脂茯苓至五百歲能坐在立
亡行於日中無影而有童子之色後乃俱還鄉里親
族死終略盡乃復還去初平改字爲赤松子初起改
字爲魯班其後服此藥得仙者數十人

王遠

王遠字方平東海人也舉孝廉除郎中稍加中散大
夫學通五經尤明天文圖讖河洛之要逆知天下盛
衰之期九州吉凶如觀之掌握後棄官入山修道道
成漢孝桓帝聞之連徵不出使郡國逼載以詣京師

遠低頭閉口不答詔乃題宮門扇板四百餘字皆說
方來之事帝惡之使削去外字適去內字復見墨皆
徹板裏削之愈分明遠無子孫鄉里人累世相傳供
養之同郡太尉陳耽爲遠營道室旦夕朝拜之但乞
福未言學道也遠在陳家四十餘年陳家曾無疾病
死喪奴婢皆然六畜繁息田桑倍獲遠忽語陳耽曰
吾期運當去不得久停明日日中當發至時遠死耽
知其仙去不敢下着地但悲啼嘆息曰先生捨我我
將何怙具棺器燒香就牀衣裝之至三日夜忽失其

屍衣冠不解如蛇蛻耳。遠卒後百餘日。眈亦卒。或謂眈得遠之道化去。或曰知眈將終。故委之而去也。初遠欲東入括蒼山。過吳住胥門。蔡經家。蔡經者小民耳。而骨相當仙。遠知之。故住其家。遂語經曰。汝生命應得度世。欲取汝以補官僚耳。然少不知道。今氣少肉多。不得上去。當爲屍解。如從狗竇中過耳。於是告以要言。乃委經而去。經後忽身體發熱如火。欲得冷水灌之。舉家汲水灌之。如沃焦石。如此三日。消耗骨立。乃入室。以被自覆。忽然失之。視其被內。唯有皮頭。

足具如蟬蛻也。去十餘年。忽還家。容色少壯。髣髴黑語家人曰。七月七日。王君當來。其日可多作飲食。以供從官。至其日。經家乃備餽器。作飲食百餘斛。羅列布置庭下。是日。王君果來。未至。先聞金鼓。簫管人馬之聲。比近。皆驚。莫知所在。及至。經舍。舉家皆見。遠冠遠遊冠。朱衣虎頭。鞶囊五色。綬帶劍。黃色少髭。長短中形人也。乘羽車。駕五龍。龍各異色。前後麾節。幡旗導從。威儀奕奕。如大將軍也。有十二伍伯。皆以蠟封其口。鼓吹皆乘龍。從天而下。懸集於庭。從官皆長。

丈餘不從道。衢旣至從官皆隱。不知所在。唯獨見遠坐耳。須臾引見經父母兄弟。因遣人召麻姑。亦莫知麻姑是何人也。信曰。王方平敬報。久不到民間。今來在此。想姑能暫來語否。須臾信還。不見其使。但聞信語曰。麻姑載拜。不相見。忽已五百餘年。尊卑有序。拜敬無階。煩信承來。在彼食頃。卽到。先受命。當按行蓬萊。今便暫往。如是當還。還便親覲。願未卽去。如此兩時。聞麻姑來來時。亦先聞人馬聲。旣至從官半於遠也。麻姑至。蔡經亦舉家見之。是好女子。年可十八九。

許於頂上作髻餘髮散垂至腰衣有文彩又非錦綺
光彩耀目不可名狀皆世之所無也入拜遠遠爲之
起立坐定各進行厨皆金盤玉杯無限也脩膳多是
諸花而香氣達於內外壁脯而食之云麟脯麻姑自
說云接待以來已見東海三爲桑田向到蓬萊又水
淺於往日會時略半耳豈將復爲陵陸乎遠嘆曰聖
人皆言海中行復揚塵也麻姑欲見蔡經母及婦等
時經弟婦新產數日姑見知之曰噫且立勿前卽求
少許米來得米擲之墮地謂以米祛其穢也視其米

皆成丹砂。遠笑曰：姑故年少也。吾老矣，不喜復作如此狡獪變化也。遠謂經家人曰：吾欲賜汝輩美酒，此酒方出天厨，其味醇醲，非俗人所宜飲。飲之或能爛腸，今當以水和之。汝輩勿恠也。乃以斗水合升酒，攪之以賜經家人。人飲一升許，皆醉良久。酒盡，遠遣左右曰：不足復還取也。以千錢與餘杭姥，乞酤酒。須臾，信還得一油囊酒五斗許，使傳餘杭姥答言：恐地上酒不中尊飲耳。麻姑手爪似鳥，經見之，心中念曰：背大癢時，得此爪以爬背，當佳也。遠以知經心中所言。

卽使人牽經鞭之謂曰麻姑神人也汝何忽謂其爪
可爬背耶但見鞭着經背亦莫見有人持鞭者遠告
經曰吾鞭不可妄得也經比舍有姓陳者失其名嘗
罷縣尉聞經家有神人乃詣門叩頭求乞拜見於是
遠使引前與語此人便欲從驅使比於蔡經遠曰君
且向日而立遠從後觀之曰噫君心邪不正終未可
教以仙道當授君地上主者之職司臨去以一符并
一傳著以小箱中與陳尉告言此不能令君度世止
能存君本壽自出百歲向上可以禳災治病者命未

終及無罪者君以符到其家便愈矣若邪鬼血食作
崇禍者便帶此符以傳勅吏遣其鬼君心中亦當知
其輕重臨時以意治之陳以此符治病有效事之者
數百家壽一百一十歲而死後子弟行其符不復
驗矣遠去後經家所作飲食數百斛皆盡亦不見有
人飲食也經父母私問經曰王君是何神人復居何
處經曰常在崑崙山往來羅浮括蒼等山山上皆有
宮室主天曹事一日之中與天上相反覆者十數過
地上五嶽生死之事皆先來告王君王君出城盡將

百官從行唯乘一黃麟將十數侍人每行常見山林
在下去地常數百丈所到則山海之神皆來奉迎拜
謁其後數十年經復暫歸家遠有書與陳尉其書廊
落大而不工先是人無知方平名遠者因此乃知之
陳尉家於今世世存錄王君手書并符傳於小箱中

伯山甫

伯山甫者雍州人也入華山中精思服食時時歸鄉
里省親如此二百年不老到人家卽數人先世以來
善惡功過有如目見又知方來吉凶言無不效其外

甥女年老多病乃以藥與之女時年已七十轉還少
色如桃花漢武遣使者行河東忽見城西有一女子
笞一老翁俛首跪受杖使者恠問之女曰此翁乃妾
子也昔吾舅氏伯山甫以神藥教妾妾教子服之不
肯今遂衰老行不及妾故杖之使者問女及子年幾
答曰妾有一百三十歲兒七十一後入華山去

馬鳴生

馬鳴生者臨淄人也本姓和字君賢少爲縣吏捕賊
爲賊所傷當時暫死忽遇神人以藥救之便活鳴生

無以報之。遂棄職隨神。初但欲治金瘡方耳。後知有長生之道。乃久隨之。爲負笈西之女几山。北到玄邱。南至廬江。周遊天下。勤苦歷年。及受太陽神丹經三卷。歸入山。合藥服之。不樂昇天。但服半劑。爲地仙。恒居人間。不過三年。輒易其處。時人不知。是仙人也。架屋舍。畜僕從。車馬竝與俗人皆同。如此展轉經歷九州五百餘年。人多識之。悉恠其不老。後乃白日昇天而去。

李八百

李八百蜀人也莫知其名歷世見之時人計其年八百歲因以爲號或隱山林或出市廛知漢中唐公昉有志不遇名師欲教授之乃先往試之爲作客傭賃者公昉不知也八百驅使用意異於他客公昉愛異之八百乃僞病困當欲死公昉卽爲迎醫合藥費數十萬錢不以爲損憂念之意形於顏色八百又轉作惡瘡周徧身體膿血臭惡不可忍近公昉爲之流涕曰卿爲吾家使者勤苦歷年常得篤疾吾取醫欲令卿愈無所吝惜而猶不愈當如卿何八百曰吾瘡不

愈須人舐之。當可。公昉乃使三婢。三婢爲舐之。八百
又曰。婢舐不愈。若得君爲舐之。卽當愈耳。公昉卽舐
復言無益。欲公昉婦舐之。最佳。又復令婦舐之。八百
又告曰。吾瘡乃欲差。當得三十斛美酒浴身。當愈。公
昉卽爲酒具。著大器中。八百卽起入酒中浴。瘡卽愈。
體如凝脂。亦無餘痕。乃告公昉曰。吾是仙人也。子有
志。故此相試。子真可教也。今當授子度世之訣。乃使
公昉夫妻并舐瘡。三婢以其浴酒自浴。卽皆更少顏
色。美悅以丹經一卷授公昉。公昉入雲臺山中作藥。

藥成服之仙去

李阿

李阿者蜀人傳世見之不老常乞於成都市所得復散賜與貧窮者夜去朝還市人莫知所止或往問事阿無所言但占阿顏色若顏色欣然則事皆吉若容貌慘戚則事皆凶若阿含笑者則有大慶微嘆者則有深憂如此候之未曾不審也有古強者疑阿異人常親事之試隨阿還所宿乃在青城山中強後復欲隨阿去然身未知道恐有虎狼私持其父大刀阿見

而怒強曰汝隨我行那畏虎也取強刀以擊石刀折
壤強憂刀敗至旦隨出阿問強曰汝愁刀敗也強言
實恐父惟怒阿則取刀左手擊地刀復如故強隨阿
還成都未至道逢人奔車阿以脚置其車下轆脚皆
折阿卽死強怖守視之須臾阿起以手撫脚而復如
常強年十八見阿年五十許強年八十餘而阿猶然
不異後語人被崑崙山召當去遂不復還也

神仙傳卷二終

神仙傳卷三

河上公

河上公者莫知其姓字漢文帝時公結草爲庵于河之濱帝讀老子經頗好之勅諸王及大臣皆誦之有所不解數事時人莫能道之聞時皆稱河上公解老子經義旨乃使齋所不決之事以問公曰道尊德貴非可遙問也帝卽幸其庵躬問之帝曰普天之下莫非王土率土之賓莫非王臣域中四大王居其一子雖有道猶朕民也不能自屈何乃高乎公卽撫掌坐

躍冉冉在虛空中去地數丈俛仰而答曰余上不至
天中不累人下不居地何民臣之有帝乃下車稽首
曰朕以不德忝統先業才小任大憂於不堪雖治世
事而心敬道直以暗昧多所不了唯願道君有以教
之公乃授素書二卷與帝曰熟研之此經所疑皆了
不事多言也余注此經以來一千七百餘年凡傳三
人連子四矣勿以示非其人言畢失其所在須臾雲
霧晦冥天地混合帝甚貴之論者以爲文帝好老子
之言世不能盡通故神人特下教之而恐漢文心未

至信故示神變所謂聖人無常心以百姓心爲心耶

劉根

劉根者字君安京兆長安人也少明五經以漢孝成
皇帝綏和二年舉孝廉除郎中後棄世學道入嵩高
山石室磬嶸峻絕之上直下五千餘丈冬夏不衣身
毛長一二尺其顏色如十四五歲人深目多鬚鬣皆
黃長三四寸每與坐或時忽然變著高冠立衣人不
覺換之時衡府君自說先祖與根同歲者至王莽時
頻使使者請根不肯往衡府君使府掾王珍問起

居根不答再令功曹趙公往山達敬根唯言謝府君更無他言後潁川太守高府君到官郡民大疫死者過半太守家大小悉得病高府君復遣珍往求根請消除疫氣之術珍叩頭述府君之言根教言於太歲宮氣上掘地深三尺以沙著其中及酒沃之君依言病者悉愈疫氣尋絕每用有效後太守張府君以根爲妖遣吏召根擬戮之一府共諫府君府君不解如是諸吏達根欲令根去根不聽府君使至請根根曰張府君欲吾何爲耶間當至耳若不去恐諸君招咎

謂卿等不敢來呼我也根是日至府時賓客滿座府君使五十餘人持刀杖繩索而立根顏色不忤府君烈聲問根曰若有何道術也答曰唯唯府君曰能召鬼乎曰能府君曰既能即可促鬼至廳前不爾當大戮根曰召鬼至易見耳借筆硯及奏按鎗鎗然作銅鐵之聲聞於外又長嘯嘯音非常清亮聞者莫不肅然衆客震悚須臾廳上南壁忽開數丈見兵甲四五百人傳呼赤衣兵數十人齎刀劍將一車直從壞壁中八來又壞壁復如故根勅下車上鬼其赤衣便乃

發車上被見下有一老翁老姥大繩反縛囚之懸頭
聽前府君熟視之乃其亡父母也府君驚愕流涕不
知所措鬼乃責府君曰我生之時汝官未達不得汝
祿養我死汝何爲犯神仙尊官使我被收困辱如此
汝何面目以立人間府君下階叩頭向根伏罪受死
請求放赦先人根勅五百兵將囚出散遣之車出去
南壁開後車過壁復如故旣失車所在根亦隱去府
君惆悵恍惚狀若發狂妻登時死良久乃蘇云見府
君家先提者大怒言汝何故犯神仙尊官使我見收

今當來殺汝其後一月府君夫婦男皆卒府掾王珍
數得見數承顏色懽然時伏地叩頭請問根學仙時
本末根曰吾昔入山精思無所不到後如華陽山見
一人乘白鹿車從者十餘人左右玉女四人執采旄
之節皆年十五六餘載拜稽首求乞一言神人乃告
余曰爾聞有韓衆否答曰實聞有之神人曰我是也
余乃自陳曰某少好道而不遇明師頗習方書按而
爲之多不驗豈根命相不應度世也有幸今日得遇
大神是根宿昔夢想之願願見哀憐賜其要訣神未

肯告余余乃流涕自搏重請神人曰坐吾將告汝汝有仙骨故得見吾耳汝今髓不滿血不煖氣少腦減筋息肉沮故服藥行氣不得其力必欲長生且先治病十二年乃可服仙藥耳夫仙道有昇天躡雲者有遊行五岳者有服食不死者有屍解而仙者凡修仙道要在服藥藥有上下仙有數品不知房中之事及行氣導引并神藥者亦不能仙也藥之上者有九轉還丹太乙金液服之皆立登天不積日月矣其次有雲母雄黃之屬雖不卽乘雲駕龍亦可役使鬼神變

化長生次乃草木諸藥能治百病補虛駐顏斷穀益
氣不能使人不死也上可數百歲下卽全其所稟而
已不足久賴也余頓首曰今日蒙敎乃天也神人曰
必欲長生先去三尸三尸去卽志意定嗜慾除也乃
以神方五篇見授云伏尸常以月望晦朔上天白人
罪過司命奪人算使人不壽人身中神欲得人生而
尸欲得人死人死則神散無形之中而成鬼祭祀之
則得歆饗故欲人死也夢與惡人鬪爭此乃尸與神
相戰也余乃從其言合服之遂以得仙珍又每見根

書符了有所呼召似人來取或數聞推問有人答對及聞鞭撻之聲而悉不見其形及地上時時有血莫測其端也根乃敎珍守一行氣存神坐三綱六紀謝過上名之法根後入雞頭山仙去

李仲甫

李仲甫者豐邑中益里人也少學道於王君服水丹有效兼行遁甲能步訣隱形年百餘歲轉少初隱百日一年復見形後遂長隱但聞其聲與人對語飲食如常但不可見有書生姓張從學隱形術仲甫言卿

性愎急未中教然守之不止費用數十萬以供酒食
殊無所得張患之乃懷匕首往先與仲甫語畢因依
其聲所在騰足而上拔匕首左右刺斫仲甫已在牀
上笑曰天下乃有汝輩愚人道學未得而欲殺之我
寧得殺耶我真能死汝但恕其頑愚不足問耳使人
取一犬來置書生前曰視我能殺犬否犬適至頭已
墮地腹已破乃叱書生曰我能使卿如犬行矣書生
下地叩頭乃止遂赦之仲甫有相識人居相去五百
餘里常以張羅自業一旦張羅得一鳥視之乃仲甫

元仙傳卷三
也語畢別去是日仲甫已復至家在民間三百餘年
後入西岳山去不復還也

李意期

李意期者本蜀人傳世見之漢文帝時人也無妻息
人欲遠行速至者意期以符與之并丹書兩腋下則
千里皆不盡日而還或說四方國土宮觀市廛人未
曾見聞說者意不解意期則爲撮土作之但盈寸其
中物皆是須臾消滅或行不知所之一年許復還於
是乞食得物卽度與貧人於城都角中作土窟居之

冬夏單衣飲少酒食脯及棗栗劉玄德欲伐吳報關
羽之死使迎意期意期到甚敬之問其伐吳吉凶意
期不答而求紙畫作兵馬器仗十數萬乃一一裂懷
之曰咄又畫作一大人掘地埋之乃徑還去備不悅
果爲吳軍所敗十餘萬衆絕數百人得還甲器軍資
畧盡玄德忿怒遂卒於永安宮意期少言人有所問
畧不對答蜀人有憂患往問之凶吉自有常候但占
其顏色若懽悅則善慘憾則惡後入琅琊山中不復
見出也

王興

王興者陽城人也居壺谷中乃凡民也不知書無學道意漢武上嵩山登大愚室石起道宮使董仲舒東顧朔等齋潔思神至夜忽見有仙人長二丈耳出頭方垂下至肩武帝禮而問之仙人曰吾九嶷之神也聞中岳石上菖蒲一寸九節可以服之長生故來採耳忽然失神人所在帝顧侍臣曰彼非復學道服食者必中岳之神以喻朕耳爲之採菖蒲服之經二年帝覺悶不快遂止時從官多服然莫能持久唯王興

聞仙人教武帝服菖蒲乃採服之不息遂得長生鄰里老少皆云世世見之竟不知所之

趙瞿

趙瞿者字子榮上黨人也得癩病重垂死或告其家云當及生棄之若死於家則世世子孫相蛀耳家人爲作一年糧送置山中恐虎狼害之從外以木砮之瞿悲傷自恨晝夜啼泣如此百餘日夜中忽見石室前有三人問瞿何人瞿度深山窮林之中非人所行之處必是神靈乃自陳乞叩頭求哀其人行諸砮中

有如雲氣了無所礙。問瞿必欲愈病。當服藥能否。瞿曰。無狀多罪。嬰此惡疾。已見疎棄。死在旦夕。若刖足割鼻而可活。猶所甚願。况服藥豈不能也。神人乃以松子松栢脂各五升。賜之。告瞿曰。此不但愈病。當長生耳。服半可愈。愈卽勿廢。瞿服之。未盡病愈。身體強健。方歸家。家人謂是鬼。具說其由。乃喜。遂更服之二年。顏色轉少。肌膚光澤。走如飛鳥。年七十餘。食雉兔皆嚼其骨。能負重。更不疲。極年百七十夜臥。忽見屋間光有如鏡者。以問左右。云不見。後一日。一室內盡

明能夜書文再見面上有二人長三尺乃美女也甚端正但小耳戲其鼻上如此二女稍長大至如人不復在面上出在前側常聞琴瑟之聲欣然懽樂在人間三百餘年常如童子顏色八山不知所之

王遙

王遙者字伯遼鄱陽人也有妻無子頗能治病病無不愈者亦不祭祀不用符水針藥其行治病但以八尺布吧敷坐於地不飲不食須臾病愈使起去其有邪魅作禍者遙畫地作獄因招呼之皆見其形人在

獄中或狐狸鼯蛇之類乃斬而燔燒之病者卽愈遙
有竹篋長數寸有一弟子姓錢隨遙數十年未嘗見
遙開之一夜大雨晦暝遙使錢以九節杖擔此篋將
錢出冒雨而行遙及弟子衣皆不濕所行道非所曾
經又常有兩炬火導前約行三十里許登小山入石
室室中有二人遙旣至取弟子所擔篋發之中有五
舌竹簧三枚遙自鼓一枚以二枚與室中二人並坐
鼓之良久遙辭去收三簧皆納篋中使錢擔之室中
二人出送語遙曰卿當早來何爲久在俗間遙答曰

我如是當來也遙還家百日天復雨遙夜忽大治裝
遙先有葛單衣及葛布巾已五十餘年未嘗着此夜
皆取着之其妻卽問曰欲捨我去乎遙曰暫行耳妻
曰當將錢去不遙曰獨去耳妻乃泣涕曰爲且復少
留遙曰如是還耳因自擔簏而去之遂不復還後三
十餘年弟子見遙在馬蹄山中顏色更少蓋地仙也

李常在

李常在者蜀郡人也少治道術百姓累世奉事計其
年已四五百歲而不老常如五十許人治病困者三

月微者一日愈在家有二男一女皆已嫁娶乃去來時從其弟子曾家孔家各請一小兒年皆十七八家亦不知常在欲何去卽遣送之常在以青竹杖度二兒遣歸置其家所臥之處徑還勿與家人語二子承教以杖歸家家人了不見兒去後乃各見死在牀上二家哀泣殯埋之百餘日弟子從郫縣逢常在將此二兒俱行二兒與弟子泣語良久各附書到二家發棺視之唯青竹杖耳乃知非死後三十餘年居地肺山更娶婦常在先婦兒乃往尋求之未至十日常在

謂後妻曰吾兒欲來見尋吾當去可將金餅與之及至求父所在婦以金與之兒曰父捨我去數十年日夜思戀聞父在此故自遠來覲省不求財也乃止三十日父不還兒乃欺其母曰父不還我去矣至外藏於草間常在還語婦曰此兒詐言如是當還汝語之汝長不復須我我在法不復與汝相見乃去少頃兒果來母語之如此兒自知不復見其父乃泣涕而去後七十餘年常在忽去弟子見在虎壽山下居復娶妻有父子世世見之如故故號之曰常在

神
仙
傳
卷
第
三
終

神仙傳卷四

劉安

漢淮南王劉安者漢高帝之孫也其父厲王長得罪徙蜀道死文帝哀之而裂其地盡以封長子故安得封淮南王時諸王子貴侈莫不以聲色游獵犬馬爲事唯安獨折節下士篤好儒學兼占候方術養士數千人皆天下俊士作內書二十二篇又中篇八章言神仙黃白之事名爲鴻寶萬畢三章論變化之道凡十萬言武帝以安辯博有才屬爲諸父甚重尊之特

詔及報書常使司馬相如等共定草乃遣使召安入
朝嘗詔使爲離騷經傳受詔食時使成奏之安每宴
見談說得失及獻諸賦頌晨八夜出乃天下道書及
方術之士不遠千里卑辭重幣請致之於是乃有八
公詣門皆鬚眉皓白門吏先密以白王王使閭人自
以意難問之曰我王上欲求延年長生不老之道中
欲得博物精義入妙之大儒下欲得勇敢武力扛鼎
暴虎橫行之壯士今先生年已耆矣似無駐衰之術
又無賁育之氣豈能究於三墳五典八索九邱鈞深

致遠窮理盡性乎三者既之餘不敢通八公笑曰我
聞王尊禮賢士吐握不倦苟有一介之善莫不畢至
古人貴九九之好養鳴吠之技誠欲市馬骨以致騏
驥師郭生以招羣英吾年雖鄙陋不合所求故遠致
其身且欲一見王雖使無益亦豈有損何以年老而
逆見嫌耶王必若見年少則謂之有道皓首則謂之
庸叟恐非發石採玉探淵索珠之謂也薄吾老今則
少矣言未竟八公皆變爲童子年可十四五角髻青
絲色如桃花門吏大驚走以白王王聞之足不履跣

而迎發思仙之臺張錦帳象牀燒百和之香進金王之几執弟子之禮北面叩首而言曰安以凡才少好道德羈鎖世務沉淪流俗不能遺累負笈山林然夙夜饑渴思願神明沐浴滓濁精誠淺薄懷情不暢邈若雲漢不期厚幸道君降屈是安祿命當蒙拔擢喜懼屏營不知所措唯願道君哀而教之則螟蛉假翼於鴻鵠可冲天矣八童子乃復爲老人告王曰余雖復淺識備爲先學聞王好士故來相從未審王意有何所欲吾一人能坐致風雨立起雲霧畫地爲江河

撮土爲山嶽一人能崩高山塞深泉收束虎豹召致
蛟龍使役鬼神一人能分形易貌坐存立亡隱蔽六
軍白日爲暝一人能乘雲步虛越海凌波出入無間
呼吸千里一人能入火不灼入水不濡刃射不中冬
凍不寒夏曝不汗一人能千變萬化恣意所爲禽獸
草本萬物立成移山駐流行宮易室一人能煎泥成
金凝鉛爲銀水鍊八石飛騰流珠乘雲駕龍浮於太
清之上在王所欲安乃日夕朝拜供進酒脯各試其
向所言千變萬化種種異術無有不救遂授王丹經

三十六卷藥成未及服而太子遷好劍自以人莫及也於時耶中雷被召與之戲而被誤中遷遷大怒被怖恐爲遷所殺乃求擊匈奴以贖罪安聞不聽被大懼乃上書於天子云漢法諸侯壅闕不與擊匈奴其罪入死安名當誅武帝素重王不咎但削安二縣耳安怒被被恐死與伍被素爲交親伍被曾以干私得罪於安安怒之未發二人恐爲安所誅乃共誣告稱安謀反天子使宗正持節治之八公謂安曰可以去矣此乃是天之發遣王王若無此事日復一日未能

去世也。八公使安登山大祭埋金地中。卽白日昇天。
八公與安所踏山上石皆陷成跡。至今人馬跡猶存。
八公告安曰：夫有籍之人，被人誣告者，其誣人當卽
死滅。伍被等今當復誅矣。於是宗正以失安所在，推
問云：王仙去矣。天子悵然，乃諷使廷尉張湯奏伍被
云：爲畫討乃誅二被九族。一如八公之言也。漢史祕
之不言安得神仙之道。恐後世人主當廢萬機而競
求於安道。乃言安得罪後自殺，非得仙也。按左吳記
云：安臨去欲誅二被。八公諫曰：不可。仙去不欲害行。

虫況於人乎。安乃止。又問八公曰：可得將素所交親，俱至彼，便遣還否？公曰：何不得爾，但不得過五人。安卽以左、吳、王、眷、傅、生等五人至。立洲，便遣還。吳記具說云：安未得上天，遇諸仙伯。安少習尊貴，稀爲卑下之禮，坐起不恭。語聲高亮，或誤稱寡人。於是仙伯主者奏安云：不敬，應斥遣去。八公爲之謝過，乃見赦。謫守都厠三年後，爲散仙人，不得處職，但得不死而已。武帝聞左、吳等隨王仙去，更還，乃詔之，親問其由。吳具以對。帝大懊恨，乃嘆曰：使朕得爲淮南王，者視天。

下如脫屣耳。遂便招募賢士。亦冀遇八公。不能得而
爲公孫卿。樂大等所欺。意猶不已。庶獲其真者。以安
仙。去分明。方知天下實有神仙也。時人傳八公安臨
去時。餘藥器置在中庭。雞犬舐啄之盡。得昇天。故雞
鳴天上。犬吠雲中也。

陰長生

陰長生者。新野人也。漢皇后之親屬。少生富貴之門。
而不好榮貴。唯專務道術。聞馬鳴生得度世之道。乃
尋求之。遂得相見。便執奴僕之役。親運履之勞。鳴生

不教其度世之法。但日夕別與之高談論當世之事。
治農田之業。如此十餘年。長生不懈。同時共事鳴生
者十二人。皆悉歸去。唯長生執禮彌肅。鳴生告之曰。
子真能得道矣。乃將入青城山中。煮黃土爲金。以示
之。立壇西面。乃以太清神丹經授之。鳴生別去。長生
乃歸。合之丹。成服半劑。不盡卽昇天。乃大作黃金十
數萬斤。以布惠天下。貧乏不問識與不識者。周行天
下。與妻子相隨。一門皆壽而不老。在民間三百餘年。
後于平都山東。白日昇天而去。著書九篇。云上古仙

者多矣。不可盡論。但漢興以來得仙者四十五人。連
余爲六矣。二十人尸解。餘竝白日昇天。抱朴子曰。洪
聞諺書有之。曰。子不夜行。則安知道上有夜行人。今
不得仙者。亦安知天下山林間。不有學道得仙者。陰
君已服神藥。未盡昇天。然方以類聚。同聲相應。便自
與仙人相集。尋索聞見。故知此近世諸仙人數耳。而
俗民謂爲不然。以已所不聞。則謂無有。不亦悲哉。夫
草澤間士。以隱逸得志。以經籍自娛。不耀文彩。不揚
聲名。不修求進。不營聞達。人猶不能識之。況仙人亦

元伯仁名臣

何急急令聞達朝闕之徒。知其所云爲哉。陰君自敘云。漢延光元年。新野山北。予受仙君神丹要訣。道成去世。付之名山。如有得者。列爲真人。行乎去來。何爲俗聞不死之要道。在神丹行氣導引。俛仰屈伸。服食草木。可得延年。不能度世。以至乎仙子欲聞道。此是要言。積學所致。無爲合神。上士爲之。勉力加勤。下愚大笑。以爲不然。能知神丹。久視長安。於是陰君裂黃素。寫丹經一通。封一文石之函。置嵩高山。一通黃樨之簡。漆書之封。以青玉之函。置太華山。一通黃金之

簡刻而書之封以白銀之函置蜀綏山一封縑書合
爲十篇付弟子使世世當有所傳付又著詩三篇以
示將來其一曰惟余之先佐命唐虞爰逮漢世紫艾
重紆予獨好道而爲匹夫高尚素志不仕王侯貪生
得生亦又何求超跡蒼霄乘龍駕浮青雲承翼與我
爲仇入火不灼蹈波不濡逍遙太極何慮何憂傲戲
仙都顧愍羣愚年命之逝如彼川流奄忽未幾泥土
爲儔奔馳索死不肯暫休其二章曰予之聖師體道
之真升降變化喬松爲隣唯余同學十有二人寒苦

求道歷二十年中多怠墮志行不堅痛乎諸子命也
自天天不妄授道必歸賢身沒幽壤何時可還嗟爾
將來勤加精研勿爲流俗富貴所牽神道一成升彼
九天壽同三光何但億千其三章曰惟余束髮少好
道德棄家隨師東西南北委放五濁避世自匿三十
餘年明山之側寒不遑衣饑不暇食思不敢歸勞不
敢息奉事聖師承歡悅色面垢足胝乃見哀識遂受
要訣恩深不測妻子延年咸享無極黃白已成貨財
千億使役鬼神玉女侍側今得度世神丹之力陰君

處民間百七十年色如女子白日昇天而去

張道陵

張道陵者沛國人也本太學書生博通五經晚乃歎曰此無益於年命遂學長生之道得黃帝九鼎丹法欲合之用藥皆糜費錢帛陵家素貧欲治生營田牧畜非已所長乃不就聞蜀人多純厚易可教化且多名山乃與弟子入蜀住鵠鳴山著作道書二十四篇乃精思鍊志忽有天人下千乘萬騎金車羽蓋驂龍駕虎不可勝數或自稱柱下史或稱東海小童乃授

陵以新出正一明威之道陵受之能治病於是百姓
翕然奉事之以爲師弟子戶至數萬卽立祭酒分領
其戶有如官長并立條制使諸弟子隨事輸出米絹
器物紙筆樵薪什物等領人修復道路不修復者皆
使疾病縣有應治橋道於是百姓斬草除溷無所不
爲皆出其意而愚者不知是陵所造將爲此文從天
上下也陵又欲以廉耻治人不喜施刑罰乃立條制
使有疾病者皆疏記生身已來所犯之辜乃手書投
水中與神明共盟約不得復犯法當以身死爲約於

是百姓計念邂逅疾病輒當首過一則得愈二使羞慚不敢重犯且畏天地而改從此之後所違犯者皆改爲善矣陵乃多得財物以市其藥合丹丹成服半劑不願卽昇天也乃能分形作數十人其所居門前水池陵常乘舟戲其中而諸道士賓客往來盈庭蓋座上常有一陵與賓客對談共食飲而眞陵故在池中。也其治病事皆採取立素但改易其大較轉其首尾而大途猶同歸也行氣服食故用仙法亦無以易故陵語諸人曰爾輩多俗態未除不能棄世正可得

吾行氣導引房中之事或可得服食草木數百歲之
方耳其有九鼎大要唯付王長而後合有一人從東
方來當得之此人必以正月七日日中到具說長短
形狀至時果有趙昇者恰從東方來生平原相見其
形貌亦如陵所說陵乃七度試昇皆過乃受昇丹經
七試者第一試昇到門不爲通使人罵辱四十餘日
露宿不去乃納之第二試使昇於草中守黍驅獸暮
遣美女非常託言遠行過寄宿與昇接牀明日又稱
脚痛不去遂留數日亦復調戲昇終不失正第三試

昇行道忽見遺金三十餅昇乃走過不取第四令昇
入山採薪三虎交前咬昇衣服唯不傷身昇不恐顏
色不變謂虎曰我道士耳少年不爲非故不遠千里
來事神師求長生之道汝何以爾也豈非山鬼使汝
來試我乎須臾虎乃起去第五試昇於市買十餘匹
絹付直訖而絹主誣之云未得昇乃脫已衣買絹而
償之殊無恡色第六試昇守田穀有一人往叩頭乞
食衣裳破弊面目塵垢身體瘡膿臭穢可憎昇愴然
爲之動容解衣衣之以私糧設食又以私米遺之第

七試陵將諸弟子登雲臺絕巖之上下有一桃樹如人臂傍生石壁下臨不測之淵桃大有實陵謂諸弟子曰有人能得此桃實當告以道要于時伏而窺之者二百餘人股戰流汗無敢久臨視之者莫不却退而還謝不能得昇一人乃曰神之所護何險之有聖師在此終不使吾死於谷中耳師有教者必是此桃有可得之理故耳乃從上自擲投樹上足不蹉跌取桃實滿懷而石壁險峻無所攀緣不能得返於是乃以桃一一擲上正得二百二顆陵得而分賜諸弟子

各一陵自食留一以待昇陵乃以手引昇衆視之見
陵臂加長三二丈引昇昇忽然來還乃以向所留桃
與之昇食桃畢陵乃臨谷上戲笑而言曰趙昇心自
正能投樹上足不蹉跌吾今欲自試投下當應得大
桃也衆人皆諫唯昇與王長嘿然陵遂投空不落桃
上失陵所在四方皆仰上則連天下則無底往無道
路莫不驚歎悲涕唯昇長二人良久乃相謂曰師則
父也自投於不測之崖吾何以自安乃俱投身而下
正墮陵前見陵坐局脚牀斗帳中見昇長二人笑曰

三
元
在
名
曰
一
吾○知○汝○來○乃○授○二○人○道○畢○三○日○乃○還○歸○治○舊○舍○諸○弟
子○驚○悲○不○息○後○陵○與○昇○長○三○人○皆○白○日○冲○天○而○去○衆
弟○子○仰○視○之○久○而○乃○沒○於○雲○霄○也○初○陵○入○蜀○山○合○丹
半○劑○雖○未○冲○舉○已○成○地○仙○故○欲○化○作○七○試○以○度○趙○昇
乃○如○其○志○也

神仙傳卷四終

神仙傳卷五

泰山老父

泰山老父者莫知姓字漢武帝東巡狩見老翁鉏於道傍頭上白光高數尺恠而問之老人狀如五十許人面有童子之色肌膚光華不與俗同帝問有何道術對曰臣年八十五時衰老垂死頭白齒落遇有道者教臣絕穀但服水飲水并作神枕枕中有三十二物其三十二物中有二十四物以當二十四氣八物以應八風臣行之轉老爲少黑髮更生齒落復出日

行三百里臣令一百八十歲矣帝受其方賜玉帛老
父後入岱山中每十年五年時還鄉里三百餘年乃
不復還

巫炎

巫炎字子都北海人也漢駙馬都尉武帝出見子都
於渭橋其頭上鬱鬱紫氣高丈餘帝召問之君年幾
何所得何術而有異氣乎對曰臣年已百三十八歲
亦無所得將行詔東方朔使相此君有何道術朔對
曰此君有陰道之術武帝屏左右而問之子都對曰

臣年六十五時苦腰痛脚冷不能自溫口乾舌苦滲
涕出百節四肢疼痛又痺不能久立得此道以來七
十三年今有子二十六人身體強勇無所疾患氣力
乃如壯時無所憂患帝曰卿不仁有道而不聞於朕
非忠臣也子都對曰臣誠知此道爲真然陰陽之事
宮中之利臣子之所難言又行之皆逆人情能爲之
者少故不敢以聞帝曰勿謝戲君耳遂受其法子都
年二百歲服餌水銀白日昇天武帝頗行其法不能
盡用之然得壽最長於先帝也

劉憑

劉憑者沛人也有軍功封壽光金鄉侯學道於稷邨
子常服石桂英及中嶽石硫黃年三百餘歲而有少
容尤長於禁氣當到長安諸賈人聞憑有道乃往拜
見之乞得侍從求見祐護憑曰可耳又有百餘人隨
憑行并有雜貨約直萬金乃於山中逢賊數百人拔
刃張弓四合圍之憑語賊曰汝輩作人當念溫良若
不能展才布德居官食祿當勤身苦體夫何有醜面
目豺狼其心相教賊道危人利已此是伏尸都市肉

饗鳥鳶之法汝等弓箭當何所用於是賊射諸客箭皆反着其身須臾之間大風折木飛沙揚塵憑大呼曰小物輩敢爾天兵從頭刺殺先造意者憑言絕而衆兵一時頓地反手背上不能復動張口短氣欲死其中首帥三人卽鼻中出血頭裂而死餘者或能語曰乞放余生改惡爲善於是諸客或斫殺者憑禁止之乃責之曰本擬盡殺汝猶復不忍今赦汝猶敢爲賊乎皆乞命曰便當易行不敢復爾憑乃勅天兵赦之遂各能奔走去嘗有居人妻病邪魅累年不愈憑

乃勅之其家宅傍有泉水水自竭中有一蛟枯死又有古廟廟間有樹樹上常有光人止其下多遇暴死禽鳥不敢巢其枝憑乃勅之盛夏樹便枯死有大蛇長七八丈懸其間而死後不復爲患憑有姑子與人爭地俱在太守坐姑子少黨而敵家多親助爲之言者四五十人憑反覆良久忽然大怒曰汝輩敢爾應聲有雷電霹靂赤光照耀滿屋於是敵人之黨一時頓地無所復知太守甚怖爲之跪謝曰願君侯少寬威靈當爲理斷終不使差失日移數丈諸人乃能起

漢孝武帝聞之詔徵而試之曰殿下有怪輒有數十人絳衣披髮持燭相隨走馬可効否憑曰此小鬼耳至夜帝僞令人作之憑於殿上以符擲之皆面搶地以火焠口無氣帝大驚曰非此鬼也朕以相試耳乃解之後入太白山中數十年復歸鄉里顏色更少按前漢書王子侯及功臣表俱無金鄉侯劉憑不審其故

樂巴

樂巴者蜀郡成都人也少而好道不修俗事時太守躬詣巴請屈爲功曹待以師友之禮巴陵太守曰聞

功曹有道寧可試見一奇乎巴曰唯卽平坐却入壁
中去冉冉如雲氣之狀須臾失巴所在壁外人見化
成一虎人竝驚虎徑還功曹舍人往視虎虎乃巴成
也後舉孝廉除郎中遷豫章太守廬山廟有神能於
帳中共外人語飲酒空中投杯人往乞福能使江湖
之中分風舉帆行各相逢巴至郡往廟中便失神所
在巴曰廟鬼詐爲天官損百姓日久罪當治之以事
付功曹巴目行捕逐若不時討恐其後遊行天下所
在血食枉病良民責以重禱乃下所在推問山川社

穆求鬼踪跡。此鬼於是走至齊郡。化爲書生。善談五經。太守卽以女妻之。巴知其所在。上表請解郡守。往捕其鬼。不出。巴謂太守賢壻。非人也。是老鬼詐爲廟神。今走至此。故來取之。太守召之不出。巴曰。出之甚易。請太守筆硯。奏案。巴乃作符。符成。長嘯空中。忽有人將符去。亦不見人形。一坐皆驚。符至。書生向婦涕泣曰。去必死矣。須與書生自齋符來。至庭見巴。不敢前。巴叱曰。老鬼何不復爾形。應聲卽便爲一狸。叩頭乞活。巴勅殺之。皆見空中刀下狸頭墮地。太守女已

生一兒。復化爲狸。亦殺之。巴去還豫章郡。多鬼又多
獨足鬼。爲百姓病。巴到後。更無此患。妖邪一時消滅。
後徵爲尚書郎。正旦大會。巴後到有酒容。賜百官酒。
又不飲。而西南向嚙之。有司奏巴不敬。詔問巴。巴曰。
臣鄉里以臣能治鬼。護病生爲臣立廟。今旦有著老
皆來臣廟中享臣。不能早飲。是以有酒容。臣適見
成都市上火。臣故漱酒爲爾救之。非敢不敬。當請詔
問虛詔抵罪。乃發驛書問成都。已奏言正旦食後失
火。須臾有大雨三陣。從東北來。火乃止。雨着人皆作。

酒氣後一旦忽大風雨天地晦冥對坐不相見因失
巴所在尋問巴還成都與親故別稱不更還老幼皆
於廟中送之云去時亦風雨晦冥莫知去處也

左慈

左慈字元放廬江人也明五經兼通星氣見漢祚將
衰天下亂起乃嘆曰值此衰亂官高者危財多者死
當世榮華不足貪也乃學道尤明六甲能役使鬼神
坐致行厨精思於天柱山中得石室中九丹金液經
能變化萬端不可勝記魏曹公聞而召之閉一石室

中使人守視斷穀期年乃出之顏色如故曹公自謂
生民無不食道而慈乃如是必左道也欲殺之慈已
知求乞骸骨曹公曰何以忽爾對曰欲見殺故求去
耳公曰無有此意公却高其志不苟相留也乃爲設
酒曰今當遠曠乞分杯飲酒公曰善是時天寒溫酒
尚熱慈拔道簪以撓酒須臾道簪都盡如人磨墨初
公聞慈求分杯飲酒謂當使公先飲以與慈耳而拔
道簪以畫杯酒中斷其間相去數寸卽飲半半與公
公不善之未卽爲飲慈乞盡自飲之飲畢以杯擲屋

棟杯懸搖動似飛鳥俯仰之狀若欲落而不落舉坐莫不視杯良久乃墜旣而已失慈矣尋問之還其所居曹公遂益欲殺慈試其能免死否乃勅收慈慈走入羣羊中而追者不分乃數本羊果餘一口乃知是慈化爲羊也追者語主人意欲得見先生暫還無怯也俄而有犬羊前跪而曰爲審爾否吏相謂曰此跪羊慈也欲收之於是羣羊咸向吏言曰爲審爾否由是吏亦不復知慈所在乃止後有知慈處者告公公又遣吏收之得慈慈非不能隱故示其神化耳於是

受執八獄吏欲拷掠之戶中有一慈戶外亦有一慈不知孰是公聞而愈惡之使引出市殺之須臾忽失慈所在乃閉市門而索或不識慈者問其狀言眇一目着青葛巾青單衣見此人便收之及爾一市中人皆眇目着葛巾青衣卒不能分公令普逐之如見便殺後有人見知便斬以獻公公大喜及至視之乃一束茅驗其尸亦亡處所後有人從荊州來見慈刺史劉表亦以慈爲惑衆擬收害之表出懼兵慈意知欲見其術乃徐徐去因又詣表云有薄禮願以餉軍

表曰道人單僑吾軍人衆安能爲濟乎慈重道之表
使視之有酒一斗器盛脯一束而十人共舉不勝慈
乃自出取之以刀削脯投地請百人奉酒及脯以賜
兵士酒三杯脯一片食之如常脯味凡萬餘人皆周
足而器中酒如故脯亦不盡坐上又有賓客千人皆
得大醉表乃大驚無復害慈之意數日乃委表去入
東吳有徐墮者有道術居丹徒慈過之墮門下有賓
客車牛六七乘欺慈云徐公不在慈知客欺之便去
客卽見牛在楊樹杪行適上樹卽不見下卽復見行

樹上又車轂皆生荆棘長一尺斫之不斷推之不動。客大懼卽報徐公有一老翁眇目吾見其不急之人因欺之云公不在去後須臾牛皆如此不知何等意公曰咄咄此是左公過我汝曹那得欺之急追可及諸客分布逐之及慈羅布叩頭謝之慈意解卽遣還去及至車牛等各復如故慈見吳主孫討逆復欲殺之後出遊請慈俱行使慈行於馬前欲自後刺殺之慈在馬前着木履挂一竹杖徐徐而行討逆着鞭策馬操兵逐之終不能及討逆知其有術乃止後慈以

意告葛仙公言當入霍山合九轉丹遂乃仙去

壺公

壺公者不知其姓名也。今世所有召軍符召鬼神治病玉府符凡二十餘卷皆出自公故。總名壺公符。時汝南有費長房者爲市掾。忽見公從遠方來入市賣藥。人莫識之。賣藥口不二價。治病皆愈。語買人曰。服此藥必吐某物。某日當愈。事無不効。其錢日收數萬。便施與市中貧乏饑凍者。唯留三五十常懸一空壺於屋上。日入之後公跳入壺中。人莫能見。唯長房樓

上見之知非常人也。長房乃日日自掃公座前地及供饌物。公受而不辭。如此積久。長房尤不懈。亦不敢有所求。公知長房篤信。謂房曰。至暮無人時。更來長房如其言。卽往。公語房曰。見我跳入壺中時。卿便可效我跳。自當得入。長房依言。果不覺已入。入後不復是壺。唯見仙宮世界。樓觀重門。閣道宮左右侍者數十人。公語房曰。我仙人也。昔處天曹。以公事不勤。見責。因謫人間耳。卿可教。故得見我。長房下座頓首曰。丙人無知。積罪却厚幸。謬見哀憫。猶入剖棺布氣生。

枯起朽但恐臭穢頑弊不任驅使若見哀憐百生之厚幸也公曰審爾大佳勿語人也公後詣長房於樓上曰我有少酒相就飲之酒在樓下長房使人取之不能舉益至數十人莫能得上乃白公公乃下以一指提上與房共飲之酒器如拳許大飲之至暮不竭告長房曰我某日當去卿能去乎房曰欲去之心不可復言欲使親眷不覺知去當有何計公曰易耳乃取一青竹杖與房戒之曰卿以竹歸家便可稱病以此竹杖置卿所臥處默然便來房如公言去後家人

見房已死屍在牀乃向竹杖耳乃哭泣葬之房詣公
恍惚不知何所公乃留房於羣虎中虎磨牙張口欲
噬房房不懼明日又內於石室中頭上有一方石廣
數丈以茅綯縣之又諸蛇來噬繩繩卽欲斷而長房
自若公至撫之曰子可教矣又令長房啗屎兼蛆長
寸許異常臭惡房難之公乃歎謝遣之曰子不能僊
道也賜子爲地上主者可得壽數百歲爲傳封符一
卷付之曰帶此可主諸鬼神常稱使者可以治病消
災房憂不得到家公以一竹杖與之曰但騎此得到

家耳房騎竹杖辭去忽如睡覺已到家家人謂是鬼
具述前事乃發棺視之唯一竹杖方信之房所騎竹
杖棄葛陂中視之乃青龍耳初去至歸謂一曰推問
家人已一年矣房乃行符收鬼治病無不愈者每與
人同坐共語常呵責嗔怒問其故曰嗔鬼耳時汝南
有鬼恠歲輒數來郡中來時從騎如太守入府打鼓
周行內外爾乃還去甚以爲患房因詣府廳事正值
此鬼來到府門前府君馳入獨留房鬼知不敢前
房大叫呼曰便捉前鬼來乃下車伏庭前叩頭乞曰

改過房呵之曰汝死老鬼不念溫良無故導從唐突
官府自知合死否急復真形鬼須臾成大鼉如車輪
頭長丈餘房又令復人形房以一札符付之令送與
葛陂君鬼叩頭流涕持札去使人追視之乃見符札
立陂邊鬼以頭繞樹而死房後到東海東海大旱三
年謂請雨者曰東海神君前來淫葛陂夫人吾係之
辭狀不測脫然忘之遂致久旱吾今當赦之令其行
雨卽便有大雨房有神術能縮地脉千里存在目前
宛然放之復舒如舊也

薊子訓

薊子訓者齊人也。少嘗仕州郡。舉孝廉。除郎中。又從軍。除駙馬都尉。人莫知其有道。在鄉里時。唯行信讓。與人從事如此。三百餘年。顏色不老人。恠之好事者。追隨之。不見其所常服藥物也。性好清澹。常閒居。讀易。小小作文。皆有意義。見比屋抱嬰兒。訓求抱之。失手墮地。兒卽死。隣家素尊敬子訓。不敢有悲哀之色。乃埋瘞之後二十餘日子。訓枉問之曰。復思兒否。隣曰。小兒相命應不合成人。死已積日。不能復思也。子


訓因出外抱兒還其家其家謂是死不敢受子訓曰
但取之無苦故是汝本兒也兒識其母見而欣笑欲
母取之抱猶疑不信子訓既去夫婦共往視所埋兒
棺中唯有一泥兒長六七寸此兒遂得長成諸老人
鬚髮畢白者子訓但與之對坐共語宿昔之中明旦
皆黑矣京師貴人聞之莫不虛心渴見無緣致之有
年少與子訓隣居爲太學生諸貴人作計共呼太學
生謂之曰子勤苦讀書欲規富貴但召得子訓來使
汝可不勞而得矣生許諾使歸事子訓灑掃供侍左


右數百日子訓知意謂生曰卿非學道焉能如此生
尚諱之子訓曰汝何不以實對妄爲虛飾吾已具知
卿意諸貴人欲見我我豈以一行之勞而使卿不獲
榮位乎汝可還京吾某日當往生甚喜辭至京與貴
人具說某日子訓當到至期未發生父母來詣子訓
子訓曰汝恐吾忘使汝兒失信不仕邪吾今食後卽
發半日乃行二千里旣至生急往拜迎子訓尚聞誰
欲見我生曰欲見先生者甚多不敢枉屈但知先生
所至當自來也子訓曰吾千里不倦豈惜寸步乎欲

見者語之。令各絕賓客。吾明日當各詣宅。生如言告諸貴人。各自絕客。灑掃。至時子訓果來。凡二十三家。各有一子訓。諸朝士各謂子訓先到其家。明朝至朝。各問子訓何時到宅。二十三人所見皆同。是所服飾顏貌無異。唯所言語隨主人意。答乃不同也。京師大驚異其神變如此。諸貴人並欲詣子訓。子訓謂生曰。諸貴人謂我重瞳八彩。故欲見我。今見我矣。我亦無所能論道。吾去矣。適出門。諸貴人冠蓋塞路而來。生具言適去矣。東陌上乘騾者是也。各走馬逐之不及。


如此半日相去常一里許終不能及遂各罷還子訓
至陳公家言曰吾明日中時當去陳公問遠近行乎
曰不復更還也陳公以葛布單衣一送之至時子訓
乃死屍僵手足交臂上不可得伸狀如屈鐵屍作五
香之芳氣達於巷陌其氣甚異乃殯之棺中未得出
棺中翕然作雷霆之音光照宅宇坐人頓伏良久視
其棺蓋乃分裂飛於空中棺中無人但遺一隻履而
已須臾間陌上有人馬簫鼓之聲徑東而去乃不復
見子訓去後陌上數十里芳香百餘日不歇也


異子賜衣金餅十里外者其餅甘不腐也
其餅與國前土餅人無能道之者其餅而主以不
其餅餅以衣金餅然空中餅中無人而應一雙餅而
餅中餘餅則雷雲之音其餅字字坐人而外其人
齊之昔孫對其餅餅其原其異其餅之餅中未餅
氏其餅餅字字交會土不再餅餅其餅餅餅餅餅
曰不亦更餅餅餅公以餅餅餅餅餅餅餅餅餅餅
至利公家言曰餅餅餅餅餅餅餅餅餅餅餅餅餅餅
神仙傳卷五終






v. 2







龍威秘書一集

漢魏叢書採珍

十九種

第五冊

神仙傳

卷六至卷十

晉葛洪

神仙傳卷六

李少君

李少君者齊人也漢武帝招募方士少君於安期先生得神丹爐火之方家貧不能辦藥謂弟子曰老將至矣而財不足雖躬耕力作不足以致辦今天子好道欲往見之求爲合藥可得恣意乃以方上帝云丹砂可成黃金成服之昇仙臣常遊海上見安期先生食棗大如瓜天子甚尊敬之賜遺無數少君常與武安侯飲食座中有一老人年九十餘少君問其名

乃言曾與老人祖父遊夜見小兒從其祖父吾故識之時一座盡驚又少君見武帝有故銅器因識之曰齊桓公常陳此器於寢座帝按言觀其刻字果齊之故器也因以少君是數百歲人矣視之如五十許人面色肌膚甚有光澤口齒如童子王公貴人聞其能令人不死莫不仰慕所遺金錢山積少君乃密作神丹丹成謂帝曰陛下不能絕驕奢遣聲色殺伐不止喜怒不勝萬里有不歸之魂市曹有流血之刑神丹大道未可得成乃以少藥方與帝少君便稱疾是夜

帝夢與少君俱上嵩高山半道有使者乘龍持節雲
中來言太乙請少君帝遂覺卽使人問少君消息且
告近臣曰朕昨夢少君捨朕去少君乃病困帝往視
之并使人受其方事未竟而卒帝曰少君不死故化
去耳及歛忽失屍所在中表衣悉不解如蟬蛻也帝
猶增歎恨求少君不勤也初少君與朝議郎董仲躬
相親愛仲躬宿有疾體枯氣少少君乃與其成藥二
劑并其方用戊巳之草後土脂黃精根獸沈先莠之
根百卉花釀亥月上旬合煎銅器中使童子沐浴潔

淨調其湯火使合成雞子三枚爲程服盡一劑身體
便輕服三劑齒落更生五劑年壽長而不復傾仲躬
爲人剛直博學五經然不達道術笑世人服藥學道
頻上書諫武帝以爲人生有命衰老有常非道術所
能延意雖見其有異將爲天性非術所致得藥竟不
服又不問其方少君去後數月仲躬病甚常聞武帝
說前夢恨惜少君仲躬憶少君所留藥試服之未半
乃身體輕壯其病頓愈服盡氣力如年少時乃信有
長生不死之道解官行求道士問其方竟不能悉曉

仲躬唯得髮不白形容盛甚年八十餘乃死囑其子
道生曰我少得少君方藥初不信事後得力無能解
之懷恨于黃泉矣汝可行求人間方術之事解其方
意長服此藥必度世也時有文成將軍亦得少君術
事武帝帝後遣使誅之文成謂使者曰爲吾謝帝不
能忍少日而敗大事乎帝好自愛後三十年求我於
成山方共事不相怨也使者還具言之帝令發其棺
視之無所見唯有竹筒一枚帝疑其弟子竊其屍而
藏之乃收捕檢問其跡帝乃大悔誅文成後復徵諸

方士更於甘泉祀太乙又別設一座祀文成帝親執禮焉

孔元方

孔元方許昌人也常服松脂茯苓松實等藥老而益少容如四十許人郗元節左元放皆爲親友俱棄五經當世之人事專修道術元方仁慈惡衣蔬食飲酒不過一升年有七十餘歲道家或請元方會同飲酒次至元方元方作一令以杖拄地乃手把杖倒豎頭在下足向上以一手持杯倒飲人莫能爲也元方有

妻子不畜餘財頗種五穀時失火諸人並來救之出
屋下衣糧牀几元方都不救唯箕踞籬下視火其妻
促使元方助收物元方笑曰何用惜此又鑿水邊岸
作一窟室方廣丈餘元方入其中斷穀或一月兩月
乃復還家人亦不得往來窟前有一栢樹生道後棘
草間委曲隱蔽弟子有急欲詣元方窟室者皆莫能
知後東方有一少年姓馮名遇好道伺候元方便尋
窟室得見曰人皆來不能見我汝得見似可教也乃
以素書二卷授之曰此道之要言也四十年得傳一

人世無其人不得以年限足故妄授若四十年無所授者卽八十年而有二人可授者卽頓接二人可授不授爲閉天道不可授而授爲泄天道皆殃及子孫我已得所傳吾其去矣乃委妻子入西嶽後五十餘年暫還鄉里時人尙有識之者

王烈

王烈者字長休邯鄲人也常服黃精及鉛年三百三十八歲猶有少容登山歷險行步如飛少時本大學書生學無不覽常與人談論五經百家之言無不該

博中散大夫譙國稽叔夜甚敬愛之數數就學共入
山遊戲採藥後烈獨之太行山中忽聞山東崩地殷
殷如雷聲烈不知何等往視之乃見山破石裂數百
丈兩畔皆是青石石中有一穴口徑濶尺許中有青
泥流出如髓烈取泥試丸之須臾成石如投熱蠟之
狀隨手堅凝氣如粳米飯嚼之亦然烈合數丸如桃
大用携少許歸乃與叔夜曰吾得異物叔夜甚喜取
而視之已成青石擊之琕琕如銅聲叔夜卽與烈往
視之斷山已復如故烈入河東抱犢山中見一石室

室中有石架架上有素書兩卷烈取讀莫識其文字不敢取去却着架上暗書得數十字形體以示康康盡識其字烈喜乃與康共往讀之至其道徑了了分明比及又失其石室所在烈私語弟子曰叔夜未合得道故也又按神仙經云神山五百年輒開其中石髓出得而服之壽與天相畢烈前得者必是也河東聞喜人多累世奉事烈者晉永寧年中出洛下遊諸處與人共戲鬪射烈挽二石弓射百步十發矢九破的一年復去又張子道者年九十餘拜烈烈平坐受

之座人恠之子道曰我年八九歲時見顏色與今無異吾今老矣烈猶有少容後莫知所之

焦先

焦先者字孝然河東人也年一百七十歲常食白石以分與人熟者如芋食之日日入山伐薪以施人先自村頭一家起周而復始負薪以置人門外人見之鋪席與坐爲設食先便坐亦不與人語負薪來如不見人便私置於門間便去連年如此及魏受禪居河之湄結草爲庵獨止其中不設牀席以草褥襯坐其

身垢污濁如泥潦或數日一食行不由徑不與女人
交游衣敝則賣薪以買故衣着之冬夏單衣太守董
經因視之又不肯語經益以爲賢被遭野火燒其
庵人往視之見先危坐庵下不動火過庵燼先方徐
徐而起衣物悉不焦灼又更作庵天忽大雪人屋多
壞先庵倒人往不見所在恐已凍死乃共拆庵求之
見先熟臥於雪下顏色赫然氣息休休如盛暑醉臥
之狀人知其異多欲從學道先曰我無道也或忽老
忽少如此二百餘歲後與人別去不知所適所請者

竟不得一言也

孫登

孫登者不知何許人也。恒止山間穴地而坐。彈琴讀易。冬夏單衣。天大寒。人視之。輒被髮自覆。身髮長丈餘。又雅容非常。歷世見之。顏色如故。市中乞得錢物。轉乞貧下。更無餘資。亦不見食。時楊駿爲太傅。使傳迎之。問訊不答。駿遺以一布袍。亦受之。出門。就人借刀。斷袍上下異處。置於駿門下。又復斫碎之時。人謂爲狂。後乃知駿當誅。斬故爲其象也。駿錄之。不放出。

登乃卒死駿給棺埋之於振橋後數日有人見登在董馬坡因寄書與洛下故人稽叔夜有邁世之志曾詣登登不與語叔夜乃扣難之而登彈琴自若久之叔夜退登曰少年才優而識寡劣於保身其能免乎俄而叔夜竟陷大辟叔夜善彈琴於是登彈一絃之琴以成音曲叔夜乃歎息絕思也

呂文敬

呂恭字文敬少好服食將一奴一婢於太行山中採藥忽見三人在谷中問恭曰子好長生乎乃勤苦難

險如是耶恭曰實好長生而不遇良方故採服此藥
冀有微益耳一人曰我姓呂字文起次一人曰我姓
孫字文陽次一人曰我姓王字文上三人皆太清太
和府仙人也時來採藥當以成新學者公旣與我同
姓又字得吾半支此是公命當應長生也若能隨我
採藥語公不死之方恭卽拜曰有幸得遇仙人但恐
暗塞多臯不足教授耳若見采收是更生之願也卽
隨仙人去二日乃授恭秘方一首因遣恭去曰可視
鄉里恭卽拜辭三人語恭曰公來二日人間已二百

年矣恭歸家但見空宅子孫無復一人也乃見鄉里數世後人趙輔者問呂恭家人皆何所在輔曰君從何來乃問此久遠人也吾昔聞先人說云昔有呂恭者持奴婢入太行山採藥遂不復還以爲虎狼所食已二百餘年矣恭有數世子孫呂習者居在城東十數里作道士民多奉事之推求易得耳恭承輔言到習家扣門問訊奴出問公從何來恭曰此是我家我昔隨仙人去至今二百餘年習聞之驚喜跣出拜曰仙人來歸悲喜不能自勝公因以神方授習而去習

已年八十服之卽還少壯至二百歲乃入山中子孫
世世不復老死

沈建

沈建丹陽人也世爲長吏建獨好道不肯仕宦學道
引服食之術還年却老之法又能治病病無輕重治
之卽愈奉事之者數百家建嘗欲遠行寄一婢三奴
驢一頭羊十口各與藥丸語主人曰但累屋不煩
飲食也便去主人大恠之曰此客所寄十五口不留
寸資當若之何建去後主人飲奴婢奴婢聞食氣皆

逆吐不用以草飼驢羊驢羊避去不食或欲抵觸主人大驚愕百餘日奴婢體貌光澤勝食之時驢羊皆肥如飼建去三年乃還各以藥一丸與奴婢驢羊乃飲食如故建遂斷穀不食輕舉飛行或去或還如此三百餘年乃絕跡不知所之也

董奉

董奉者字君異侯官人也吳先主時有少年爲奉本縣長見奉年四十餘不知其道罷官去後五十餘年復爲他職行經侯官諸故吏人皆老而奉顏貌一如

往日問言君得道邪。吾昔見君如此。吾今已皓首而君轉少何也。奉曰偶然耳。又杜燮爲交州刺史得毒病死。死已三日。奉時在彼。乃往與藥三丸。內在口中。以水灌之。使人捧舉其頭。搖而消之。須臾手足似動。顏色漸還。半日乃能起坐。後四日乃能語云。死時奄忽如夢。見有十數烏衣人來收燮上車去。入大赤門。徑以付獄中。獄各一戶。戶纏容一人。以燮內一戶中。乃以土從外封塞之。不復見外光。忽聞戶外人言云。太乙遣使來召杜燮。又聞除其戶。土良久引出。見有

車馬赤蓋三人共坐車上一人持節呼爓上車將還至門而覺爓遂活因起謝曰甚蒙大恩何以報効乃爲奉起樓於庭中奉不食他物唯啖脯棗飲少酒爓一日三度設之奉每來飲食或如飛鳥騰空來坐食了飛去人每不覺如是一年餘辭爓去爓涕泣留之不住爓問欲何所之莫要大船否奉曰不用船唯要一棺器耳爓卽爲具之至明日日中時奉死爓以其棺殯埋之七日後有人從容昌來奉見囑云爲謝爓好自愛理爓聞之乃啓殯發棺視之唯存一帛一面

畫作人形一面丹書作符後還豫章廬山下居有一
人中有癘疾垂死載以詣奉叩頭求哀之奉使病人
坐一房中以五重布巾蓋之使勿動病者云初聞一
物來舐身痛不可忍無處不匝量此舌廣一尺許氣
息如牛不知何物也良久物去奉乃往池中以水浴
之遣去告云不久當愈勿當風十數日病者身赤無
皮甚痛得水浴痛卽止二十日皮生卽愈身如凝脂
後忽大旱縣令丁士彥議曰聞董君有道當能致雨
乃自齋酒脯見奉陳大旱之意奉曰雨易得耳因視

屋曰貧道屋皆見天。恐雨至何堪。令解其意曰。先生但致雨當爲立架好屋。明日士彥自將人吏百餘輩運竹木起屋立成。方聚土作泥擬數里取水奉曰。不須爾暮當大雨乃止。至暮卽大雨高下皆平方。民大悅。奉居山不種田。曰爲人治病亦不取錢。重病愈者使栽杏五株。輕者一株。如此數年計得十萬餘株。鬱然成林。乃使山中百禽羣獸游戲其下。卒不生草。常如芸治也。後杏子大熟於林中。作一草倉示時人曰。欲買杏者不須報奉。但將穀一器置倉中。卽自往取。

一器杏去常有人置穀來少而取杏去多者林中羣虎出吼逐之大怖急挈杏走路傍傾覆至家量杏一如穀多少或有人偷杏者虎逐之到家嚙至死家人知其偷杏乃送還奉叩頭謝過乃却使沽奉每年貨杏得穀旋以賑救貧乏供給行旅不逮者歲二萬餘斛縣令有女爲精邪所魅醫療不効乃投奉治之若得女愈當以侍巾櫛奉然之卽召得一白鼃長數丈陸行詣病者門奉使侍者斬之女病卽愈奉遂納女爲妻久無兒息奉每出行妻不能獨住乃乞一女養

之年十餘歲。奉一日竦身入雲中去。妻與女猶存其宅。賣杏取給。有欺之者。虎還逐之。奉在人間三百餘年。乃去。顏狀如三十時人也。

神仙傳卷七

太玄女

太玄女姓顓名和少喪父或相其母子皆曰不壽惻然以爲憂常曰人之處世一失不可復生况聞壽限之促非修道不可以延生也遂行訪明師洗心求道得王子之術行之累年遂能入水不濡盛雪寒時置衣冰上而顏色不變身體溫煖可至積日又能徙官府宮殿城市屋宅於他處視之無異指之卽失其所。在門戶櫝櫃有關鑰者指之卽開指山山摧指樹樹

拆更指之卽復如故。將弟子行山間。日暮以杖叩石。卽開門戶入其中。屋宇床褥幃帳廩供酒食如常。雖行萬里所在常爾。能令小物忽大如屋。大物忽小如毫芒。或吐火張天。噓之卽滅。又能坐炎火之中。衣履不燃。須臾之間。或化老翁。或爲小兒。或爲車馬。無所不爲。行三十六術。甚効起死迴生。救人無數。不知其何所服食。亦無得其術者。顏色益少。鬢髮如鴉。忽白日昇天而去。

西河少女

西河少女者神仙伯山甫外甥也。山甫雍州人。入華山學道。精思服食。時還鄉里。省親族。二百餘年容狀益少。八人家卽知其家先世已來善惡功過。有如目擊。又知將來吉凶。言無不效。見其外甥女年少多病。與之藥。女服藥時年已七十。稍稍還少。色如嬰兒。漢遣使行經西河。於城東見一女子。笞一老翁。頭白如雪。跪而受杖。使者恠而問之。女子答曰。此是妾兒也。昔妾舅伯山甫得神仙之道。隱居華山中。愍妾多病。以神藥授妾。漸復少壯。今此兒妾令服藥。不肯致此。

神仙傳卷一
衰老行不及妾妾悲之故因杖耳使者問女及兒年
各幾許女子答云妾年一百三十歲兒年七十一矣
此女亦入華山而去

程偉妻

漢期門郎程偉妻得道者也能通神變化偉不甚異
之偉當從駕出行而服飾不備甚以爲憂妻曰止闕
衣耳何愁之甚耶卽致兩匹縑忽然自至偉亦好黃
白之術煉時卽不成妻乃出囊中藥少許以器盛水
銀投藥而煎之須臾成銀矣偉欲從之受方終不能

得云偉骨相不應得逼之不已。妻遂斃然而死。尸解而去。

麻姑

漢孝桓帝時神仙王遠字方平降於蔡經家。將至一時。頃聞金鼓簫笳人馬之聲。及舉家皆見王方平戴遠遊冠。着朱衣虎頭鞶囊。五色之綬。帶劍。少鬚黃色。中形人也。乘羽車。駕五龍。龍各異色。麾節幡旗。前後導從。威儀奕奕如大將軍。鼓吹皆乘麟。從天而下。懸集於庭。從官皆長丈餘。不從道行。旣至。從官皆隱不

知所在唯見方平與經父母兄弟相見獨坐久之卽
令人相訪經家亦不知麻姑何人也言曰王方平敬
報姑余久不在人間今集在此想姑能暫來語乎有
頃使者還不見其使但聞其語云麻姑再拜不見忽
已五百餘年尊卑有敘修敬無階煩信來承在彼登
山顛倒而先受命當按行蓬萊今便暫往如是當還
還便親覲願未卽去如此兩時間麻姑至矣來時亦
先聞人馬簫鼓聲旣至從官半於方平麻姑至蔡經
亦舉家見之是好女子年十八九許於頂中作髻餘

髮垂至腰其衣有文章而非錦綺光綵耀目不可名
狀入拜方平方平爲之起立坐定召進行厨皆金盤
玉杯餽膳多是諸花果而香氣達於內外擘脯行之
如柏靈云是鱗脯也麻姑自說云接侍以來已見東
海三爲桑田向到蓬萊水又淺于往者會時畧半也
豈將復還爲陵陸乎方平笑曰聖人皆言海中復揚
塵也姑欲見蔡經母及婦姪時弟婦新產數十日麻
姑望見乃知之曰噫且止勿前卽求少許米得米便
撒之擲地視其米皆成真珠矣方平笑曰姑故年少

吾老矣了不喜復作此狡獪變化也。方平語經家人曰：吾欲賜汝輩酒，此酒乃出天厨，其味醇醲，非世人所宜飲。飲之或能爛腸。今當以水和之。汝輩勿恠也。乃以一升酒合水一斗攪之，賜經家飲一升許。良久酒盡，方平語左右曰：不足遠取也。以千錢與餘杭姥相聞，求其沽酒。須臾信還，得一油囊酒五斗許。信傳餘杭姥答言：恐地上酒不中尊飲耳。又麻姑爲爪蔡經見之，心中念言：背大癢，時得此爪以爬背，當佳。方平已知經心中所念，卽使人牽經鞭之，謂曰：麻姑神

人也汝何忽謂爪可以爬背耶但見鞭着經背亦不見有人持鞭者方平告經曰吾鞭不可妄得也是日又以一符傳授蔡經鄰人陳尉能檄召鬼魔救人治疾蔡經亦得解蛻之道如蛻蟬耳經常從王君遊山海或暫歸家王君亦有書與陳尉多是篆文或真書字廓落而大陳尉世世寶之宴畢方平麻姑命駕昇天而去簫鼓道從如初焉

樊夫人

樊夫人者劉綱妻也綱仕爲上虞令有道術能檄召

鬼神禁制變化之事亦潛修密證人莫能知爲理尚
清靜簡易而政令宣行民受其惠無水旱疫疘驚暴
之傷歲歲大豐暇日常與夫人較其術用俱坐堂上
綱作火燒客碓屋從東起夫人禁之卽滅庭中兩株
挑夫妻各咒一株使相鬪擊良久綱所咒者不知數
走出籬外綱唾盤中卽成鯉魚夫人唾盤中成獺食
魚綱與夫人入四明山路阻虎綱禁之虎伏不敢動
適欲往虎卽滅之夫人徑前虎卽面向地不敢仰視
夫人以繩繫虎於床脚下綱每共試術事事不勝將

昇天縣廳側先有大皂莢樹。綱昇樹數丈。方能飛舉。夫人平坐。冉冉如雲氣之昇。同昇天而去。

嚴清

嚴清會稽人家貧。常於山中作炭。忽有一人與清語。不知其異人也。臨別以一卷書與清。曰。汝得長生。故以相投。當以潔器盛之。置於高處。清受之後。得其術。入霍山仙去。

帛和

帛和字仲理。遼東人也。入地肺山。事董奉。奉以行氣。

服術法授之。告和曰：吾道盡此，不能得神丹、金砂。周遊天下，無山不往。汝今少壯，廣求索之。和乃到西城山，事王君。王君語和大道訣曰：此山石室中，當熟視北壁，當見壁有文字，則得道矣。視壁三年，方見文字。乃古人之所刻，太清中經神丹方及三皇天文大字。五岳真形圖皆著石壁，和諷誦萬言，義有所不解。王君乃授之訣，後入林慮山爲地仙。林慮一名隆慮，其山南連大行，北接恒岳，有仙人樓高五十丈。

東陵聖母

東陵聖母廣陵海陵人也適杜氏師劉綱學道能易
形變化隱見無方杜不信道常怒之聖母理疾救人
或有所詣杜恚之愈甚訟之官云聖母姦妖不理家
務官收聖母付獄頃之已從獄窗中飛去衆望見之
轉高入雲中留所着履一雙在窗下於是遠近立廟
祠之民所奉事禱之立効常有一青鳥在祭所人有
失物者乞問所在青鳥卽飛集盜物人之上路不拾
遺歲月稍久亦不復尔至今海陵縣中不得爲姦盜
之事大者卽風波沒溺虎狼殺之小者卽復病也

葛玄

葛玄字孝先從左元放受九丹金液仙經未及合作
常服餌木尤長於治病鬼魅皆見形或遣或殺能絕
穀連年不饑能積薪烈火而坐其上薪盡而衣冠不
灼飲酒一斛便入深泉澗中臥酒解乃出身不濡濕
玄備覽五經又好談論好事少年數十人從玄游學
嘗舟行見器中藏書札符數十枚因問此符之驗能
爲何事可得則否玄曰符亦何所爲乎卽取一符投
江中逆流而上曰何如客曰異矣又取一符投江中

停立不動須臾下符上符下二符合一處。玄乃取之。又江邊有一洗衣女。玄謂諸少年曰。吾爲卿等走此女。何如。客曰。善。乃投一符于水中。女便驚走數里。許不止。玄曰。可以使止矣。復以一符投水中。女卽止。還人問女何怖而走。答曰。吾自不知何故也。玄常過主人。主人病。祭祀道精人。而使玄飲酒。精人言語不遜。玄大怒曰。奸鬼敢爾。敕五伯。曳精人縛柱。鞭脊。卽見如有人牽精人出者。至庭抱柱解衣投地。但聞鞭聲。血出淋漓。精人故作鬼語乞命。玄曰。赦汝死罪。汝

能令生人病愈否。精人曰：能。玄曰：與汝三日期。病者不愈，當治汝。精人乃見放。玄嘗行過廟，此神常使往來之人未至百步，乃下騎。乘中有大樹數十株，上有羣鳥，莫敢犯之。玄乘車過，不下。須臾有大風迴逐玄，車塵埃漫天。從者皆辟易。玄乃大怒曰：小邪，敢爾！卽舉手止風。風便止。玄還以符投廟中樹上，鳥皆墮地而死。後數日，廟樹盛夏皆枯。尋廟屋火起，焚燒悉盡。玄見買魚者在水邊，玄謂魚主曰：欲煩此魚至河伯處可乎？魚人曰：魚已死矣，何能爲？玄曰：無苦也。乃以

魚與玄玄以丹書紙置魚腹擲魚水中俄頃魚還躍
上岸吐墨書青色如大葉而飛去玄常有賓後來者
出迎之坐上又有一玄與客語迎送亦然時天寒玄
謂客曰貧居不能人人得爐火請作火共使得煖玄
因張口吐氣赫然火出須臾滿屋客盡得如在日中
亦不甚熱諸書生請玄作可以戲者玄皆患熱方仰
臥使八以粉粉身未及結衣答曰熱甚不能起作戲
玄因徐徐以腹揩屋棟數十過還復牀上及下冉冉
如雲氣腹粉着屋棟連日尚在玄方與客對食食畢

漱口口中飯盡成大蜂數百頭飛行作聲良久張口
羣蜂還飛入口中玄嚼之故是飯也玄手拍牀蝦蟇
及諸蟲飛鳥燕雀魚鼈之屬使之舞皆應絃節如人
玄止之卽止玄冬中能爲客設生瓜夏致冰雪又能
取數十錢使人散投井中玄徐徐以器於上呼錢出
於是一一飛從井中出悉入器中玄爲客致酒無人
傳杯杯自至人前或飲不盡杯亦不去畫流水卽爲
逆流十丈許于豈有一道士頗能治病從中國來欺
人言我數百歲玄知其誑後會衆坐玄謂所親曰欲

知此公年否所親曰善忽有人從天上下舉座矚目
良久集地着朱衣進賢冠入至此道士前曰天帝詔
問公之定年幾許而欺誑百姓道士大怖下牀長跪
答曰無狀寔年七十三立因撫手大笑忽然失朱衣
所在道士大慙遂不知所之吳大帝請立相見欲加
榮位立不聽求去不得以客待之常共遊宴坐上見
道間人民請雨帝曰百姓請雨安可得乎立曰易得
耳卽便書符著社中一晷之間天地晦冥大雨流注
中庭平地水尺餘帝曰水寧可使有魚乎立曰可復

書符水中須臾有大魚百許頭亦各長一二尺走水中。帝曰可食乎。玄曰可。遂使取治之。乃真魚也。常從帝行舟遇大風百官船無大小多濡沒。玄船亦淪失。所在帝歎曰。葛公有道亦不能免此乎。乃登四望山使人船鉤船沒已經宿。忽見玄從水上來。旣至尚有酒色。謝帝曰。昨因侍從而伍子胥見疆牽過。卒不得拾去。煩勞至尊。暴露水次。玄每行卒逢所親。要于道間樹下折草刺樹以杯器盛之。汁流如泉。杯滿卽止飲之。皆如好酒。又取土石草木以下酒入口。皆是鹿

脯其所刺樹以杯承之杯至卽汁出杯滿卽止他人
取之終不爲出也或有請玄玄意不欲往主人疆之
不得已隨去行數百步玄腹痛止而臥地須臾死舉
頭頭斷舉四肢四肢斷更臭爛虫生不可復近請之
者遽走告玄家更覓玄故在堂上此人亦不敢言之
走還向玄死處已失玄尸所在與人俱行能令去地
三四尺仍並而步又玄游會稽有賈人從中國過神
廟廟神使主簿教語賈人曰欲附一封書與葛公可
爲致之主簿因以函書擲賈人船頭如釘着不可取

及達會稽卽以報玄玄自取之卽得語弟子張大言
曰吾爲天子所逼留不遑作大藥今當尸解八月十
三日日中崑當發至期玄衣冠入室臥而氣絕其色
不變弟子燒香守之三日夜半忽大風起發屋折木
聲如雷炬滅良久風止忽失玄所在但見委衣床上
帶無解者旦問隣家隣家人言了無大風風止此一
宅籬落樹木皆敗折也

神仙傳卷八

鳳綱

鳳綱者漁陽人也常採百草花以水漬封泥之自正月始盡九月未止埋之百日煎九火卒死者以藥內口中皆立活綱常服此藥至數百歲不老後入地肺山中仙去

衛叔卿

衛叔卿者中山人也服雲母得仙漢元封二年八月壬辰孝武皇帝閒居殿上忽有一人乘雲車駕白鹿

從天而下來集殿前其人年可三十許色如童子羽
衣皇冠帝乃驚問曰爲誰答曰吾中山衛叔卿也帝
曰子若是中山人乃朕臣也可前共語叔卿本意謁
帝謂帝好道見之必加優禮而帝令云是朕臣也於
是大失望默然不應忽焉不知所在帝甚悔恨卽遣
使者梁伯至中山推求叔卿不得見但見其子名度
世卽將還見帝問云汝父今在何所對曰臣父少好
仙道嘗服藥導引不交世事委家而去已四十餘年
云當入太華山也帝卽遣使者與度世共之華山求

尋其父到山下欲上輒火不能上也積數十日度世
謂使者曰豈不欲令吾與他人俱往乎乃齋戒獨土
未_レ到其嶺於絕巖之下望見其父與數人博戲於石
上紫雲鬱鬱於其上白玉爲牀又有數仙童執幢節
立其後度世望而再拜叔卿曰汝來何爲度世曰帝
甚恨前日倉卒不得與父言語今故遣使者梁伯與
度世共來願更得見父也叔卿曰前爲太上所遣欲
誠帝以大災之期及救危厄之法國祚可延而彊梁
自貴不識真道而反欲臣我不足告語是以去耳今

當與中黃太乙共定天元。吾終不復往耳。度世曰。不
審向與父並坐是誰也。叔卿曰。洪崖先生許由巢父
火低公飛黃子王子晉薛容耳。今世向大亂。天下無
聊。後數百年間。土滅金亡。汝歸當取吾齋室西北隅
大柱下玉函。函中有神素書。取而按方。合服之。一年
可能乘雲而行。道成來就吾於此。勿得爲漢臣也。亦
不復爲語。帝也度世。於是拜辭而去。下山見梁伯。不
告。所以梁伯意度世必有所得。乃叩頭於度世。求乞
道術。先是度世與之共行。見伯情行溫實。乃以語之。

梁伯但不見柱下之神方耳後樞得玉函封以飛仙之香取而餌服乃五色雲母遂合藥服之與梁伯俱仙去留其方與子而世人多有得之者

墨子

墨子者名翟宋人也仕宋爲大夫外治經典內修道術著書十篇號爲墨子世多學者與儒家分途務尚儉約頗毀孔子有公輸般者爲楚造雲梯之械以攻宋墨子聞之往詣楚脚壞裂裳裹足七日七夜到見公輸般而說之曰子爲雲梯以攻宋宋何罪之有餘

於地而不足於民殺所不足而爭所有餘不可謂智
宋無罪而攻之不可謂仁知而不爭不可謂忠爭而
不得不可謂彊公輸般曰吾不可以已言於王矣墨
子見王曰於今有人捨其文軒隣有一弊輿而欲竊
之舍其錦繡隣有短褐而欲竊之舍其梁肉隣有糟
糠而欲竊之此爲何若人也王曰若然者必有狂疾
翟曰楚有雲夢之麋鹿江漢之魚龜爲天下富宋無
雉兔鮒魚猶梁肉與糟糠也楚有杞梓豫章宋無數
丈之木此猶錦繡之與短褐也臣聞大王更議攻宋

有與此同王曰善哉然公輸般已爲雲梯謂必取宋於是見公輸般墨子解帶爲城以幘爲械公輸般乃設攻城之機九變而墨子九拒之公輸之攻城械盡而墨子之守有餘也公輸般曰吾知所以攻子矣吾不言墨子曰吾知子所以攻我我亦不言王問其故墨子曰公輸之意不過殺臣謂宋莫能守耳然臣弟子禽滑釐等三百人早已操臣守禦之器在宋城上而待楚寇矣雖殺臣不能絕也楚乃止不復攻宋墨子年八十有二乃歎曰世事已可知榮位非常保將

委流俗以從赤松子游耳。乃入周狄山精思道法。想像神仙。於是數聞左右山間有誦書聲者。墨子臥後。又有人來以衣覆足。墨子乃伺之。忽見一人乃起問之曰。君豈非山岳之靈氣乎。將度世之神仙乎。願且少留。誨以道要。神人曰。知子有志好道。故來相候。子欲何求。墨子曰。願得長生與天地相畢耳。於是神人授以素書。朱英丸方。道靈敎戒。五行變化。凡二十五篇。告墨子曰。子有仙骨。又聰明。得此便成。不復須師。墨子拜受。合作。遂得其驗。乃撰集其要。以爲五行記。

乃得地仙隱居以避戰國至漢武帝時遣使者楊遵東帛加璧以聘墨子墨子不出視其顏色常如五十許人周游五嶽不止一處

孫博

孫博者河東人也有清才能屬文著書百餘篇誦經數十萬言晚乃好道治墨子之術能令草木金石皆爲火光照數里亦能使身成火口中吐火指大樹生草則焦枯更指還如故又有人亡奴藏匿軍中者捕之不得博語奴主曰吾爲卿燒其營舍奴必走出卿

但諦伺捉之。於是博以一赤丸子擲軍門。須臾火起。燭天。奴果走出。乃捉得之。博乃復以一青丸子擲之火。卽滅。屋舍百物如故。不損博。每作火有所燒他人。以水灌之。終不可滅。須臾自止。之方止。行水火中。不沾灼。亦能使千百人從已。蹈之俱不沾灼。又與人往水上布席而坐。飲食作樂。使眾人舞於水上。又山間石壁地上盤石博。入其中。漸見背及兩耳。良久都沒。又能吞刀劍數千枚。及壁中出入如孔穴。也能引鏡爲刀。屈刀爲鏡。可積時不改。須博指之。乃復如故。後

八林慮山服神丹而仙去

天門子

天門子者姓王名綱尤明補養之要故其經曰陽生立於寅純木之精陰生立於申純金之精天以木投金無往不傷故陰能疫陽也陰人所以著脂粉者法金之白也是以真人道士莫不留心注意精其微妙審其盛衰我行青龍彼行白虎取彼朱雀煎我玄武不死之道也又陰人之情也每急於求陽然而外自戕抑不肯請陽者明金不爲木屈也陽性氣剛燥志

神仙傳卷八
飭疎略至於游宴言和氣柔辭語卑下明木之畏於金也。天門子旣行此道年二百八十歲猶有童子之色。乃服珠醴得仙入玄洲山去也。

玉子

玉子者姓韋名震南郡人也。少好學。衆經周幽王徵之不出。乃歎曰。人生世間日失一日。去生轉遠。去死轉近。而但貪富貴。不知養性命。人盡氣絕。則死位爲王侯金玉如山。何益於灰土乎。獨有神仙度世。可以無窮耳。乃師長桑子。具受衆術。別造一家之法。著道。

書百餘篇其術以務魁爲主而精於五行之意演其
微妙以養性治病消災散禍能起飄風發屋折木作
雷雨雲霧能以木瓦石爲六畜龍虎立成能分形爲
百千人能涉江海含水噴之皆成珠玉亦不變或時
閉氣不息舉之不起推之不動屈之不曲伸之不直
或百日數十日乃起每與子弟行各九泥爲馬與之
皆令閉目須臾成大馬乘之日行千里又能吐氣五
色起數丈見飛鳥過指之卽墮臨淵投符召魚鼈之
屬悉來上岸能令弟子舉眼見千里外物亦不能久

也其務甦時以器盛水着兩肘之間噓之水上立有
赤光輝輝起一丈以此水治病病在內飲之在外者
洗之皆立愈後入崆峒山合丹白日昇天而去

沈羲

沈羲者吳郡人學道於蜀中但能消災治病救濟百
姓不知服藥物功德感天天神識之羲與妻賈共載
詣子婦卓孔寧家還逢白鹿車一乘青龍車一乘白
虎車一乘從者皆數十騎皆朱衣仗矛帶劍輝赫滿
道問羲曰君是沈羲否羲愕然不知何等答曰是也

何爲問之騎人曰羲有功於民心不忘道自少小以
來履行無過壽命不長年壽將盡黃老今遣仙官來
下迎之侍郎薄延之乘白鹿車是也度世君司馬生
青龍車是也迎使者徐福白虎車是也須臾有三仙
人羽衣持節以白玉簡青玉介丹玉字授羲羲不能
識遂載羲昇天昇天之時道間鋤耨人皆共見不知
何等斯須大霧霧解失其所在但見羲所乘車牛在
田食苗或有識是羲車牛以語羲家弟子恐是邪鬼
將羲藏山谷間乃分布於百里之內求之不得四百

餘年忽還鄉里推求得數世孫名懷喜懷喜告曰聞
先人說家有先人仙去久不歸也留數十日說初上
天時云不得見帝但見老君東向而坐左右勅羲不
得謝但默坐而已宮殿鬱鬱如雲氣玉色玄黃不可
名狀侍者數百人多女少男庭中有珠玉之樹衆芝
叢生龍虎成羣遊戲其間聞琅琅如銅鐵之聲不知
何等四壁熠熠有符書着之老君身形略長一丈被
髮文衣身體有光耀須臾數玉女持金按玉杯來賜
羲曰此是神丹飲者不死夫妻各一杯壽萬歲乃告

言飲服畢拜而勿謝服藥後賜棗二枚大如雞子脯
五寸遺羲曰暫還人間治百姓疾病如欲上來書此
符懸之竿杪吾當迎汝乃以一符及仙方一首賜羲
羲奄忽如寐已在地上多得其符驗也

陳安世

陳安世京兆人也爲權叔本家傭賃稟性慈仁行見
禽獸常下道避之不欲驚之不踐生蟲未嘗殺物年
十三四叔本好道思神有二仙人託爲書生從叔本
游以觀試之而叔本不覺其仙人也久而意轉怠叔

本在內方作美食而二仙復來詣門問安世曰叔本
在否答曰在耳入白叔本叔本卽欲出其婦引還而
止曰餓書生輩復欲求飽腹耳於是叔本使安世出
答言不在二人曰前者云在施言不在何也答曰大
家君教我云耳二人善其誠實乃謂叔本勤苦有年
今適值我二人而乃懈怠是其不過幾成而敗乃問
安世曰汝好遊戲耶答曰不好也又曰汝好道乎答
曰好而無由知之二人曰汝審好道明日早會道北
大樹下安世承言早往期處到日西不見一人乃起

欲去曰書生定欺我耳二人已在其側呼曰安世汝
來何晚也答曰早來但不見君耳二人曰吾端坐在
汝邊耳頻三期之而安世輒早至知可教乃以藥二
丸與安世誠之曰汝歸勿復飲食別止於一處安世
承誠二人常來往其處叔本恠之曰安世處空室何
得有人語往輒不見叔本曰向聞多人語聲今不見
一人何也答曰我獨語耳叔本見安世不復食但飲
水止息別位疑非常人自知失賢乃歎曰夫道尊德
貴不在年齒父毋生我然非師則莫能使我長生先

聞道者卽爲師矣。乃執弟子之禮朝夕拜事之。爲之灑掃安世道。成白日昇天臨去。遂以要道術授叔本。叔本後亦仙去矣。

劉政

劉政者沛人也。高才博物學無不覽。以爲世之榮貴乃須臾耳。不如學道可得長生。乃絕進取之路。求養生之術。勤尋異聞。不遠千里。苟有勝已。雖奴客必師。事之復治。墨子五行記。兼服朱英。凡年百八十餘歲。色如童子。能變化隱形。以一人分作百人。百人作千

人千人作萬人又能隱三軍之衆使成一叢林木亦
能使成鳥獸試取他人器物易置其處人不知覺又
能種五果立使華實可食坐致行廚飯膳俱數百人
又能吹氣爲風飛砂揚石以手指屋宇山陸壺器便
欲頽壞復指之卽還如故又能化生美女之形及作
水火又能一日之中行數千里能噓水與雲奮手起
霧聚土成山刺地成淵能忽老忽少乍大乍小入水
不沾步行水上召江海中魚鼈蛟龍黿鼉卽皆登岸
又口吐五色之氣方廣十里直上連天又能躍上下

去地數百丈後去不知所在

神仙傳卷八終

神仙傳卷九

茅君

茅君者幽州人學道於齊二十年道成歸家父母見之大怒曰汝不孝不親供養尋求妖妄流走四方欲笞之茅君長跪謝曰某受命上天當應得道事不兩遂違遠供養雖日多無益今乃能使家門平安父母壽考其道已成不可鞭辱恐非小故父怒不已操杖向之適欲舉杖杖卽摧成數十段皆飛如弓激矢中壁壁穿中柱柱陷父乃止茅君曰向所言正慮如此

邂逅中傷人耳父曰汝言得道能起死人否茅君曰
死人罪重惡積不可得生橫傷短折卽可起耳父使
爲之有驗茅君弟在仕至二千石當之官鄉里送者
數百人茅君亦在座乃曰余雖不作二千石亦當有
神靈之職某月某日當之官賓客皆曰願奉送茅君
曰顧肯送誠君甚厚意但當空來不須有所損費吾
當有以供待之至期賓客並至太作宴會皆青縑帳
幄下鋪重白氍奇饌異果芬芳羅列妓女音樂金石
俱奏聲震天地聞於數里隨從千餘人莫不醉飽及

迎官來文官則朱衣素帶數百人武官則甲兵旌旗
器械耀日結營數里茅君與父母親族辭別乃登羽
蓋車而去麾幡翳鬱驪虬駕虎飛禽翔獸躍覆其上
流雲彩霞霏霏繞其左右去家十餘里忽然不見遠
近爲之立廟奉事之茅君在帳中與人言語其出入
或發人馬或化爲白鶴人有病者往請福常煮雞子
十枚以內帳中須臾一一擲出還之歸破之若其中
黃者病人當愈若有土者卽不愈常以此爲候

孔安國

孔安國者魯人也。常行氣服鈆丹。年二百歲。色如童子。隱潛山。弟子隨之數百人。每斷穀入室。一年半復出。益少。其不入室。則飲食如常。與世人無異。安國爲人沉重。尤寶惜道。要不肯輕傳。其奉事者五六年。審其爲人志性。乃傳之。有陳伯者。安樂人也。求事安國。安國以爲弟子。留三年。知其執信。乃謂之曰。吾亦少更勤苦。尋求道術。無所不至。遂不能得。神丹八石。登天之法。唯受地仙之方。適可以不死。而昔事海濱漁父。漁父者。故越相范蠡也。乃易姓名。隱以避凶。世哀

孔有志授我秘方服餌之法以得度世則大伍司誠
子期姜伯塗山皆千歲之後更少壯吾受道以來服
藥三百餘年以其一方授崔仲卿卿年八十四服藥
已三十三年矣視其肌體氣力甚健鬚髮不白口齒
完堅子往與相見事之陳伯遂往事之受其方亦度
世不老又有張合妻年五十服之反如二十許人一
縣恠之八十六生一男又教數人皆四百歲後入山
去亦有不度世者由於房中之術故也

尹軌

尹軌者字公度太原人也博學五經尤明天文星氣
河洛讖緯無不精微晚乃學道常服黃精華日三合
計年數百歲其言天下盛衰安危吉凶未嘗不効腰
佩漆竹筒十數枚中皆有藥言可辟兵疫常與人一
丸令佩之會世大亂鄉里多懼其難惟此家免厄又
大疫時或得粒許大塗門則一家不病弟子黃理居
陸渾山中患虎暴公度使其斷木爲柱去家五里四
方各埋一柱公度卽印封之虎卽絕迹到五里輒還
有恠鳥止屋上者以白公度公度爲書一符着鳥所

鳴處至夕鳥伏死符下或有人遭喪當葬而貧汲汲
無以辦公度過省之孝子遂說其孤苦公度爲之愴
然令求一片鉛公度入荆山架小屋於爐火中銷鉛
以所帶藥如米大投鉛中攪之乃成好銀與之告曰
吾念汝貧困不能營葬故以拯救慎勿多言也有人
負官錢百萬身見收縛公度於富人借數千錢與之
令致錫得百兩復銷之以藥方寸七投之成金還官
後到太和山中仙去也

介象

介象者字元則會稽人也學通五經博覽百家之言
能屬文後學道入東山善度世禁氣之術能於茅草
燃火煮雞而不焦令一里內人家炊不熟雞犬三日
不鳴不吠令一市人皆坐不能起隱形變化爲草木
鳥獸聞有五丹經周旋天下尋求之不得其師乃入
山精思冀遇神仙憊極臥石上有一虎往舐象額象
寤見虎乃謂之曰天使汝來侍衛我汝且停若山神
使汝試我卽疾去虎乃去象入山谷上有石子紫色
光綠甚好大如雞子不可稱數乃取兩枚谷深不能

前乃還於山中見一美女年十五六許顏色非常被服五綵真神仙也象乞長生之方女曰子可送手中物看故處乃可汝未應取此物吾故止待汝象送石還見女子在前處語象曰汝血食之氣未盡斷穀三年更來吾止此象歸斷穀三年復往見此女故在前處乃以還丹經一首授象告之曰得此便得仙勿復他爲也乃辭歸象常往弟子駱廷雅舍帷下屏牀中有數生論左傳義不平象傍聞之不能忍乃忿然爲決書生知非常人密表薦於吳主象知之欲去曰法

官事拘束我耳。廷雅固留吳王微至武昌甚尊敬之。
稱爲介君。詔令立宅供帳。皆是綺繡。遺黃金千鎰。從
象學隱形之術。試還後宮。出入閨闈。莫有見者。如此
不一。嘗爲吳主種瓜菜百菓。皆立生。可食。吳主共論
膾魚何者最美。象曰：鰭魚膾爲上。吳主曰：論近道魚
耳。此出海中。安可得邪。象曰：可得。乃令人於殿庭中
作方堦。汲水滿之。并求鉤象起餌之。垂綸於堦。須臾
果得鰭魚。吳主驚喜。問象可食不。象曰：故爲此。下取
作生膾。安敢取不可食之物。乃使厨下切之。吳主曰：

聞蜀使來得蜀薑作齏甚好恨爾時無此象曰蜀薑
豈不易得願差所使者可付直吳主指左右一人以
錢五千付之象書一符以著青竹杖中使行人閉目
騎杖止便買薑訖復閉目此人承言騎杖須與止
已至成都不知是何處問人知是蜀市乃買薑于時
吳使張溫先在蜀既於市中相識甚驚便作書寄其
家此人買薑畢捉書負薑騎杖閉目須臾已還吳厨
下切膾適了象又能讀諸符文如讀書無誤謬者或
不信之取諸雜符除其注以示象象皆一一別之其

幻法種種變化不可勝數。後告言病。帝遣左右姬侍以美梨一奩賜象。象食之。須臾便死。帝埋葬之以日中時死。晡時已至建業。所賜梨付苑吏種之。吏後以表聞。先主卽發棺視之。唯一符耳。帝思之。與立廟。時躬往祭之。常有白鶴來集座上。遲廻復去。後弟子見在藍竹山中。顏色轉少。

仙公

蘇仙公者桂陽人也。漢文帝時得道。先生早喪所怙鄉中。以仁孝聞。宅在郡城東北。出入往來不避燥濕。

至於食物不憚精粗先生家貧常自牧牛與里中小
兒更日爲牛郎先生牧之牛則徘徊側近不驅自歸
餘小兒牧牛牛則四散跨岡越嶮諸兒問曰爾何術
也先生曰非汝輩所知常乘一鹿先生常與母共食
母曰食無鮮他日可往市買也先生於是以筯插飯
中攜錢而去斯須卽以鮮至母食去畢母曰何處買
來對曰便縣市也母曰便縣去此百二十里道途徑
嶮往來遽至汝欺我也欲杖之先生跪曰買鮮之時
見舅在市與我語云明日來此請待舅至以驗虛實

母遂寬之明曉舅果到云昨見先生便縣市買鮓母
卽驚駭方知其神異先生曾持一竹杖時人謂曰蘇
生竹杖固是龍也數歲之後先生灑掃門庭修飾墻
宇友人曰有何邀迎答曰仙侶當降俄頃之間乃見
天西北隅紫雲氤氲有數十白鶴飛翔其中翩翩然
降於蘇氏之門皆化爲少年儀形端美如十八九歲
人怡然輕舉先生歛容逢迎乃跪白母曰某受命當
仙被召有期儀衛已至當違色養卽便拜辭母子歔
歔母曰汝去之後使我如何存活先生曰明年天下

疾疫庭中井水簷邊橘樹可以代養井水一升橘葉一枚可療一人兼封一櫃留之有所闕乏可以扣櫃言之所須當至慎勿開也言畢卽出門踟躕顧望聳身入雲紫雲捧足羣鶴翱翔遂昇雲漢而去來年果有疾疫遠近悉求母療之皆以水及橘葉無不愈者有所闕乏卽扣櫃所須卽至三年之後母心疑因卽開之見雙白鶴飛去自後扣之無復有應母年百餘歲一旦無疾而終鄉人共葬之如世人之禮葬後忽見州東北牛脾山紫雲蓋上有號哭之聲咸知蘇君

之神也郡守鄉人皆就山弔慰但聞哭聲不見其形
郡守鄉人苦請相見空中答曰出俗日久形貌殊凡
若當露見誠恐驚恠固請不已卽出半面示一手皆
有細毛異常人也因謂郡守鄉人曰遠勞見慰途徑
險阻可從直路而還不須迴顧言畢卽見橋亘嶺傍
直至郡城行次有一官吏輒迴顧遂失橋所墮落江
濱乃見一赤龍於橋下宛轉而去先生哭處有桂竹
兩枝無風自掃其地恒淨三年之後無復哭聲因見
白馬常在嶺上遂改牛脾山爲白馬嶺自後有白鶴

來止郡城東北樓上人或挾彈彈之鶴以爪攫樓板
似漆書云城郭是人民非三百甲子一來歸吾是蘇
君彈何爲至今修道之人每至甲子日焚香禮於仙
公之故第也

按御覽引此傳云蘇仙公名林字子玄
周武王時濮陽曲水人與此微有不同

成仙公

成仙公者諱武丁桂易臨武烏里人也後漢時年十
三身長七尺爲縣小吏有異姿少言大度不附人人
謂之癡少有經學不授於師但有自然之性時先被
使京還過長沙郡投郵舍不及遂宿於野樹下忽聞

樹上人語云向長沙市藥平旦視之乃二白鶴仙公
異之遂往市見二人罩白傘相從而行先生遂呼之
設食食訖便去曾不顧謝先生乃隨之行數里二人
顧見先生語曰予有何求而隨不止先生曰僕少出
陋賤聞君有濟生之術是以侍從耳二人相向而笑
遂出玉函看素書果有武丁姓名於是與藥二丸令
服之二人語先生曰君當得地仙遂令還家明照萬
物獸聲鳥鳴悉能解之先生到家後縣使送餉府君
府君周昕有知人之鑒見先生呼曰汝何姓名也對

曰姓成名武丁縣司小吏府君異之乃留在左右人
之署爲文學主簿嘗與衆共坐聞羣雀鳴而笑之衆
問其故答曰市東車翻覆米羣雀相呼往食遣視之
信然也時郡中寮吏豪族皆恠不應引寒小之人以
亂職位府君曰此非卿輩所知也經旬日乃與先生
居閣直至年初元會之日三百餘人令先生行酒酒
巡徧訖先生忽以杯酒向東南嚔之衆客愕然恠之
府君曰必有所以因問其故先生曰臨武縣火以此
救之衆客皆笑明日司儀上事稱武丁不敬卽遣使

往臨武縣驗之縣人張濟上書稱元日慶集飲酒晡時火忽延燒廳事從西北起時天氣清澄南風極烈見陣雲自西北直聳而上徑止縣大雨火卽滅雨中皆有酒氣衆疑異之乃知先生蓋非凡人也後府君令先生出郡城西立宅居止只有母一小弟及兩小兒比及二年先生告病四宿而殞府君自臨殯之經兩日猶未成服先生友人從臨武來於武昌岡上逢先生乘白驪西行友人問曰日將暮何所之也答曰暫往迷溪斯須却返我去向來忘大刀在戶側履在

雞棲上可過語家人收之友人至其家聞哭聲大驚
曰吾向來於武昌岡逢先主共語云暫至迷溪斯須
當返令過語家人收刀并履何得爾乎其家人云刀
履并入棺中那應在外卽以此事往啓府君府君遂
令發棺視之不復見尸棺中唯一青竹杖長七尺許
方知先生託形仙去時人謂先生乘驟於武昌岡乃
改爲驟岡在郡西十里也

郭璞

郭璞字景純河東人也周識博聞有出世之道鑒天

文地理龜書龍圖文象讖緯安墓卜宅莫不窮微善
測人鬼之情狀李洪範林明道論景純善於遙寄綴
文之士皆同宗之晉中興王導受其成旨以建國社
稷璞盡規矩制度仰範太微星辰俯則河洛黃圖夫
帝王之作必有天人之助者矣王敦鎮南州欲謀大
逆乃召璞爲佐時明帝年十五一夕集朝士問太史
王敦果得天下邪史臣曰王敦致天子非能得天下
明帝遂單騎微行直入姑熟城敦正與璞食璞久之
不自敦敦驚曰吾今同議定大計卿何不卽言璞曰

向見日月星辰之精靈五岳四海之神祇皆爲道從
翌衛下官震悸失守不卽得白將軍敦使聞謂是小
奚戲馬檢定非也遣三十騎追不及敦曰吾昨夜夢
在石頭城外江中扶犁而耕占之璞曰大江扶犁耕
亦自不成反反亦無所成敦怒謂璞曰卿命盡幾何
璞曰下官命盡今日敦誅璞江水暴上市璞尸出城
南坑見璞家載棺器及送終之具已在坑側兩松樹
間上有鵲巢璞逆報家書所言也謂伍伯曰吾年十
三時於柵塘脫袍與汝吾命應在汝手中可用吾刀

伍伯感昔念惠銜涕行法殯後三日南州市人見璞
貨其平生服飾與相識共語非但一人敦不信開棺
無尸璞得兵解之道今爲水仙伯注山海經夏小正
爾雅方言著遊仙詩江賦卜繇客傲洞林云

尹思

尹思者字小龍安定人也晉元康五年正月十五夜
坐屋中遣兒視月中有異物否兒曰今年當大水中
有一人被簑帶劍思目視之曰將有亂卒至兒曰何
以知之曰月中人乃帶甲仗矛當大亂三十年復當

小清耳後果如其言

神仙傳卷九終

所イイタ

神仙傳卷十

沈文泰

沈文泰者九疑人也得紅泉神丹法土符延年益命之道服之有效欲之崑崙留安息二十餘年以傳李文洞曰土符却老不去服藥行道無益也文淵遂受秘要後亦昇仙後以竹根汁煮丹及黃白去三尸法出此二人矣

涉正

涉正字玄真巴東人也說秦始皇時事了了似及見

者漢末從二十弟子入吳莫有見其開目者有一弟子固請之正乃爲開目目開時有音如霹靂而光如電照于弟子皆不覺頓伏良久乃能起正已復還閉目正道成莫見其所服食施行而授諸弟子皆以行氣絕房室及服石腦小丹去

皇化

九靈子姓皇名化得還年却老胎息內視之要五行之道其經曰此術可以辟五兵却虎狼安全已身營護家門保子宜孫內外和穆人見則喜不見則思旣

宜從軍又利遠客他人謀已消滅不成千殃萬禍伏
而不起杜奸邪之路絕妖怪之門咒詛之者其災不
成厭蠱之者其禍不行天下諸賢皆來宗已傾神靈
之心得百姓之意在人間五百餘年顏色益少後復
煉丹乃登仙去

北極子

北極子姓陰名恒其經曰治身之道愛神爲寶養性
之術死入生出常能行之與天相畢因生求生真生
矣以鐵冶鐵之謂真以人治人之謂神後服神丹仙

去

李修

絕洞子姓李名修其經曰弱能制強陰能弊陽常若
臨深履危御奔乘駕長生之道也年四百餘歲顏色
不衰著書四十篇名曰道源服還丹昇天也

柳融

南極子姓柳名融能含粉成雞子吐之數十枚煮而
啖之與雞子無異黃中皆餘粉少許如指端者取杯
呪之卽成龜煮之可食腸藏皆具而杯成龜殼煮取

肉則殼還成杯矣取水呪之卽成美酒飲之醉人舉
手卽成大樹人或折其細枝以刺屋間連日猶在以
漸萎壞與真木無異也服雲霜丹得仙去

葛越

黃盧子姓葛名越甚能治病千里寄姓名與治之皆
愈不必見病人身也善氣禁之道禁虎狼百蟲皆不
得動飛鳥不得去水爲逆流一里年二百八十歲力
舉千鈞行及走馬頭上常有五色氣高丈餘天下大
旱時能到淵中召龍出催促便升天使作雨數數如

此一旦與親故別乘龍而去遂不復還

陳永伯

陳永伯者南陽人也得淮南王七星散方試按含服之二十一日忽然不知所在永伯有兒子名增族年十七亦服之其父繫其足閉密戶中晝夜使人守視之二十八日亦復不見不知所之本方云服之三十日得仙陳氏二子服未三十日而失所在後人不敢服僊去必有僊官來迎但人不見之耳

董仲君

董仲君者臨淮人也少行氣煉形年百餘歲不老常見誣繫獄佯死臭爛生蟲獄家舉出而後復生尸解而去

王仲都

王仲都漢人也一云道士學道於梁山遇太白真人授以虹丹能禦寒暑已二百許年漢元帝召至京師試其方術嘗以嚴冬之月從帝而遊令仲都單衣乘駟馬車於上林昆明池環水馳走帝御狐裘而猶覺寒仲都貌無變色背上氣蒸怱怱然又當盛夏曝之

日中圍以十鑪火口不稱熱身不流汗後亦仙去桓
君山著新論稱其人

離明

太陽子姓離名明本王子同年友也王子學道已成
太陽子乃事王子盡弟子之禮不敢懈怠然王子特
親愛之有門人三千餘人莫與其比也好酒常醉頗
以此見責然善爲五行之道雖鬢髮班白而肌膚豐
盛面目光華三百餘歲猶自不改王子謂之曰汝當
理身養性而爲衆賢法師而低迷大醉功業不修大

藥不合雖得千歲猶未足以免死況數百歲者乎此
凡庸所不爲况於達者乎對曰晚學性剛俗態未除
故以酒自驅其驕慢如此著七寶樹之術深得道要
服丹得仙時時在世間五百歲中面如少童多酒故
其鬢髮皓白也

劉京

劉京者本漢文帝時侍郎也從邯鄲張君學道受餌
雲母朱英方服之百三十餘歲視之如三十許人能
知吉凶之期又能爲人祭天益命或延得十年五年

至魏武帝時京遊諸弟子家皇甫隆聞而隨事之以
雲母丸子方教隆隆合服之得三百歲不能盡其道
法故不得度世又有王公於京處得九子丸時王公
已七十歲服之御八十妾生二十兒騎馬獵行日二
百里飲酒一斛不醉得壽二百歲

清平吉

清平吉沛國人漢高皇帝時衛卒也至光武時容色
不老後尸解去百餘年復還鄉里數日間又尸解而
去

黃山君

黃山君者修彭祖之術年數百歲猶有少容亦治地
仙不取飛昇彭祖既去乃追論其言爲彭祖經得彭
祖經者但爲水中之松栢也

靈壽光

靈壽光者扶風人也年七十餘而得朱英丸方合而
服之致得其效轉更少壯年如二十時漢獻帝建安
元年光已二百二十歲常寄寓於江陵胡田家無疾
而卒田殯埋之百餘日人復見在小黃寄書與田田

得書掘發棺之中一無所有釘亦不脫唯履在棺中

李根

李根字子源許昌人也有趙買者聞其父祖言傳世見根買爲兒時便隨事根至買年八十四而根年少不老嘗住壽春吳太文家太文從之學道作金銀法立成根能變化入水火中坐致行厨能供二十人皆精細之饌四方奇異之物非當地所有也忽告太文曰王凌當敗壽春當陷兵中不復居可急徙去太文竊以語弟弟無意泄之王凌聞之以爲妖言惑衆乃

使人收根欲殺之根時乃方欲書疏奄聞外有千餘人圍吳家求根根語太文父曰勿勿但語吾不知官自來搜之昨日去矣太文出戶還顧窺根失所在左右書器物皆不復見於是官兵入索困食衣篋之中無處不徧不得根及良久太文出見根故在向坐儼然如故語太文曰王太尉當族誅卿弟泄語十日中當卒死皆果如言弟子家又有以女給根者此女知書根出行竊取根素書一卷讀之得根自記其學道經疏云以漢元封中學道於某甲時年計根以七百

餘年也又太文說根兩目童子皆方按仙經云八百
歲人童子方也根告諸弟子言我不得神丹大道之
訣唯得地僊方爾壽畢天地然不爲下土之士也

黃敬

黃敬字伯嚴武陵人也少讀誦經書仕州爲部從事
後棄世學道於霍山八十餘年復入中岳專行服氣
斷穀爲吞吐之事胎息內治召六甲玉女吞陰陽符
又思赤星在洞房前轉大如火周身至二百歲轉還
少壯道士王紫陽數往見之求要言敬告子陽曰吾

不修服藥之道。但守自然。蓋地仙耳。何足詰問。問新
野陰君神丹昇天之法。此真大道之極也。子可從之。
人能除遺嗜欲。如我者。亦可以學我所爲也。紫陽固
請不止。敬告紫陽曰。太關之中。有輔星。想而見之。翕
習成赤童在焉。指朱庭指而挫之。煉身形消遣三尸。
除死名。審能守之。可長生。失之不久。淪幽冥。紫陽受
之得長生之道也。

甘始

甘始者太原人也。善行氣。不飲食。又服天門冬。行房

中之事依容成立素之法更演益之爲一卷用之甚
有近效治病不用針灸湯藥在世百餘歲乃入王屋
山僊去

平仲節

括蒼山有學道者平仲節河中人以大胡亂中國時

謂劉淵
劉聰也

來度江入括蒼山受師宋君存心鏡之道具

百神行洞房事如此積四十五年中精思身形更少
體有真氣晉穆帝永和元年五月一日中央黃老遣
迎卽日乘雲駕龍白日升天今在滄浪雲臺

宮嵩

宮嵩者琅琊人也有文才著書百餘卷師事仙人于
吉漢元帝時嵩隨吉於曲陽泉上遇天仙授吉青縑
朱字大平經十部吉行之得道以付嵩後上此書書
多論陰陽否泰災眚之事有天道地道人道云治國
者用之可以長生此其旨也嵩服雲母數百歲有童
子之色後出入紵嶼山仙去

王真

王真字叔經上黨人也年七十九乃學道行胎息之

術斷穀三十餘年容少而色美行及走馬力兼數人
魏武帝聞之召相見似三十許人意疑其詐遂驗問
其鄉里皆異口同辭多自兒童時見之者真年已四
百歲矣武帝乃信其道甚加欽禮焉郗元節事真十
餘年真以蒸丹小餌法授之容常不衰後登女几山
仙去

陳長

陳長在紆嶼山上已六百餘歲紆嶼山中人爲架屋
每四時烹殺以祭之長亦不飲食顏色如六十歲人

諸奉事者每有疾病卽以器詣長乞祭水飲之皆愈
紵嶼山上累世相承事之莫知其所來及服食本末
紵嶼在東海中吳中周詳者誤到其上留三年乃得
還具說之如此紵嶼其山地方圓千里上有千餘家
有五穀成熟莫知其年紀風俗與吳同

班孟

班孟者不知何許人或云女子也能飛行終日又能
坐空虛之中與人言語又能入地中初沒足至腰及
胸漸漸但餘冠幘良久而盡沒不見又以指刺地卽

成泉井而可汲引又汲人屋上瓦瓦卽飛入人家人
家有桑果數千株皆聚之成積如山如此十餘日吹
之各還本處又能含墨舒紙著前嚼墨噴之皆成文
字滿紙各有意義後服酒餌丹年四百歲更少容入
大冶山中仙去

董子陽

董子陽少知長生之道隱博落山中九十餘年但食
桃飲石泉後逢司馬季主季主以導仙八方與之遂
度世

東郭延

東郭延者山陽人服雲母散能夜書有數十人乘虎豹來迎比鄰盡見之與親友辭別而去云詣崑崙山

戴孟

戴孟本姓燕名濟字仲微漢明帝時人也入華山及武當山受裴君玉佩金璫經及受石精金光符復有太微黃書能周遊名山

魯女生

魯女生長樂人初餌胡麻及朮絕穀八十餘年日少

元一
壯色如桃花日能行三百里走及麋鹿傳世見之云
三百餘年後采藥嵩高山見一女人曰我三天太上
侍官也以五岳真形與之并告其施行女生道成一
旦與知友故人別云入華山去後五十年先相識者
逢女生華山廟前乘白鹿從玉女三十人并令謝其
鄉里故人

陳子皇

陳子皇得餌术要方服之得仙去霍山妻姜氏疾病
其壻用餌术法服之病自愈安壽一百七十歲登山


取术重擔而歸不息不極顏色氣如二十許人

封衡


封衡字君達隴西人也幼學道通老莊學勤訪真訣
初服黃連五十年後入鳥獸山採藥又服术百餘年
還鄉里如二十許人聞有病死者識與不識便以腰
間竹管藥與之或下鍼應手立愈愛啻精氣不極視
大言凡圖籍傳記無不習誦復遇魯女生授還丹訣
及五嶽真形圖遂周遊天下故山官水神潛相迎伺
而凶鬼怪物無不竄避人或疑之以矢刃刺禦皆不

能害常駕一青牛人莫知其名因號青牛道士魏武帝問養性大略師曰體欲常勞食欲常少勞勿過極少勿過虛去肥濃節酸鹹減思慮損喜怒除馳逐慎房室則幾於道矣故聖人春夏養陽秋冬養陰以順其根以契造化之妙有二侍者一負書笈一攜藥笥有容成養氣術十二卷墨子隱形法一篇靈寶衛生經一卷笥有煉成水銀霜黃連屑等在人間僅二百餘年後入元邛山不見

神仙傳卷十終







FOR USE IN
LIBRARY
ONLY

EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5

GR
335
K6
1794